

Mark Riwana Aiaina, Mark i girugirumia

Pariverena

Wei lamna God Natuna Iesu Keriso Messiah Riwana Aiaina karena. Rava wei bukana i girumi, wavana ega ita riweta. Wate tauviararamana e ririwa da Mark i girumi. Mark, lamna ega Apasol, wate tauviararamana magamagaui i notai da tauna, Peter maiteni au Rome i mae. Ma Peter, Iesu ana kaua ma ana viararamana magamagaui Mark i riwei. Anina ma Mark wei riwana i girumi da tauvitumaiana au Rome ita aramanei, Iesu aiwai i kaei.

Riwa karena i girugirumia e viviegeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapana da kaua magamagaui ita kaei. Wei kauai tana inanai maranai: e viviararamana; ma arua-apoapoei e viviagaiana-opunei; ma rava doridoriai e vivilawani; ma go'apoapoe e notanota tawanei. Mark, Iesu ana nola ma ana kaua i girumi ma ega ana viararamana ita girumaguratei. Mark i viegeta menanare Iesu au korosi i raige da rava anatapui ita vilawanai ma God menanare, Iesu iragalei i vovaimairini.

*John Taubabataito, Iesu ana aninae
i vovokaukauei*

(Matthew 3:1-12; Luke 3:1-18; John 1:19-28)

¹ Wei lamna Iesu Keriso Messiah God natuna Riwana Aiaina karena.

² Wariāga peroveta Isaiah i girugirumia nanare:
 “*Ona rautaniānā! Au peroveta au naom ana paritawanei da am aninae ina vokaukauei.*” (*Malakai 3:1*)

³ [☆]“*Peroveta au mutulua e viviāgoregore: Taumi BADA ana aninae ona vokaukauei, ana eta ona vovai-jijimani!*” (*Isaiah 40:3*)

⁴ Ma taupariverena John i nei au mutulua da rava i bababataitoi ma God riwana i jimejimei i pa, “Ami āgo’apoapoe ona voterei, ma ona mae-taviremi God awarina ma ami āgo’apoapoe ina nota-tawanei ma ana babataitoimi.”

⁵ Ma rava anatapui Judea au paratana ma au Jerusalem i nae da John ita rautaniānā. Maranai ai āgo’apoapoe i rupeni, John, taui i bababataitoi au waira Jordan.

⁶ Ma John, *kamel* aparana metametanana i oteoteni ma ana tairoro āgamoāgamo opina. Ana lam kapau ma manigewa.

⁷ Ma tauna, rava i ririwei i pa, “Rava au muriu e nenei i āgetelara, ēga me tau. Ēga tagotagogiu da ana ae uma āguravana ana rupeni.

⁸ Tau wairei a bababataitoimi, wate tauna, Arua Vivivireinei ina bababataitoimi.”

*John, Iesu i bababataitoi
 (Matthew 3:13-17; Luke 3:21-22)*

⁹ Lamna maranaina Iesu, Nasaret, Galili i netawanei ma i nei ma John au waira Jordan, tauna i bababataitoi.

[☆] **1:3:** Isa 40:3

¹⁰ Ma maranai Iesu wairei i ġeġetai, i 'nana da mara i wanatawanei ma Arua Vivivireina me gabubu i ġairai.

¹¹ [◇]Ma God ponana marei i opu ma i riwa i pa, “Tam, tau natu au nuavaina ma u vinuaiainiu.”

*Satan, Iesu i raelari
(Matthew 4:1-11; Luke 4:1-13)*

¹² Ma lamna au murina God Aruana Vivivireina Iesu i paritawanana-opunei au mutulua.

¹³ Ma au pom 40 au mutulua i mae. Ma Satan, tauna i raelari. Ġamoġamo ġaiġaiawai nai au dobuna i mamae ma God ana anela marei tauna i paini.

*Iesu, lebalebaġai ruāga ma ruāga i raukwatuei
(Matthew 4:12-22)*

¹⁴ Ma gulau Herod, John i pani. Ma muriai Iesu i nae au Galili da rava awarri God Riwana Aiaina i jimej.

¹⁵ Ma Iesu i ririwa i pa, “God ana mara vinevinena i ġetai. God ana vibadana vouna rava aubai, lamna i turiai. Ami ġo'apoapoena ona rupeni ma ona mae-tavirem ma Riwana Aiaina ona vitumaġanei!”

¹⁶ Mara tagogi Iesu Galili topana au gerana i bababara nae. Ma lebalebaġai ruāga i 'nanai, Simon* ma ana tevera Andrew au topa i rarauagida.

¹⁷ Iesu i riwei i pa, “Ona nei ma ona votaġotaġgoju. Ma me marina iana o tutuarui; nanare, ana viararamanimi da rava ona tuarui da ina vitumaġaneu!”

[◇] **1:11:** Gen 22:2; Isa 42:1; Mrk 9:7 * **1:16:** Wavana ġelauna Peter

18 Ma maratogogi ai agida i voterei ma Iesu i votaḡotaḡoi.

19 Ma taui au gera i verau-nae. Iesu, Zebedi natunatuna i 'nanai, James ma John ai au waga ai agida wanawanarorona i yokaukauei.

20 Ma maratogogi taui i ḡorei, "Taumi ona nei ma ona votaḡotaḡoui!" Ma taui amai Zebedi[†] ana taunola maiteni i voterei ma Iesu i votaḡotaḡoi.

Iesu, arua-apoapoena rava awarina i viaḡaḡana-opunei

(Luke 4:31-37)

21 Iesu ana Tauvotaḡotaḡo maiteni i nae au Capeniam.[‡] Ma au Sabat, Iesu i rui au pari numana ma God Riwana Aiaina, viararamana i vikarei.

22 Tauna ana rewapanana i viararamana eḡa me mai Jew ai tarawatu babadai § nanare. Ma taurautaniḡana ana viararamana i baiei.

23 Maranai Iesu pari au numana i viviararamana ma oroto arua-apoapoena orana i ruiruinia i garara

24 i pa, "Iesu Nasareti, aiwai e ḡoeḡoei awariai. Tam weka u nei da ma viapoapoeniai bo? Tau a aramanei tam aiai. Tam Vivivirem Godei!"

25 Ma Iesu riwa bagibaginei i riwei i pa, "Ma genuana! Nai orotona ma opu-tawanei!"

26 Ma arua-apoapoena orotona i viaikwajiei ma ponana i rata, i garara ma i opu-tawanei.

27 Ma rava anatapui i bana-kauei ma taui ava i vitarapiri, "Wei aiwai? Wei viararamana vouna ma ana rewapanana maiteni! Wei ravana awarina

† **1:20:** Eng. *Zebedi*. ‡ **1:21:** Eng. *Capernaum*. § **1:22:** Wariāga BADA, ana Tarawatu Moses i verei mai Israel aubai.

rewapana e mamae da arua-apoapoena i riwei ma tauna i vovoteletelei!"

²⁸ Iesu nolana, maratagogi i tua Galili au anata-puna.

*Iesu, rava maḡamaḡau i vilawani
(Matthew 8:14-17; Luke 4:38-41)*

²⁹ Nai marana pari numana i opu-tawanei ma ana tauvotaḡotaḡo maiteni i nae Simon ma Andrew ai au numa. James ma John maiteni i nae.

³⁰ Simon poiana wavinena ini ḡuḡurana ana au animatave i matamatave ma maranai Iesu i ḡeta ma numa ravai, tauna i pariverei.

³¹ Tauna i nae wavine awarina, nimana i vojjini ma i voagui da i vomairi. Lamna maranaina, ini ḡuḡurana i voterei ma wavinena, taui i paini.

³² Ma au bigai madeḡa i neulai au murina, rava, ai rava doridoriai ma aiavoi arua-apoapoei au orai maemae, i neiai Iesu awarina.*

³³ Ma rava anatapui nai au melagaina i vitagogie i numa au metaetana.

³⁴ Ma Iesu, maḡamaḡau i doria nununai i vilawani ma arua-apoapoe maḡamaḡau rava awari i viaḡaḡana-opunei. Ma arua-apoapoena i aramanei da tauna anina God natuna ma lamna aubaina taui i viḡaei da i genuana.†

* **1:32:** *Madeḡa ina neulai au murina* anona lauvitau ana mara damona. Mai Jew ait lauvitau ana mara au Friday madeḡa e neneulai au murina e vivikarei da Saturday madeḡa e neneulai au murina e vorovorovei. † **1:34:** Iesu i aramanei, mepa da ita kaei da arua-apoapoei ita riwa da tauna Keriso; lamna rava tauna ita egari da sorodia ita vibadei ma ta viḡavia, me taui e vivinua-notenotei nanare. Jhn 6:15 ma inanai.

*Iesu au Galili i raugugula nae
(Luke 4:42-44)*

³⁵ Ubaubanai boibogi, Iesu i vomairi ma numa i opu-tawanei ma i nae gabu au genuguanana. Ma kampa, God awarina i raupari.

³⁶ Muriai, Simon ana rava maiteni i nae da i baiei.

³⁷ Ma maranai Iesu i nelaāgai, ma i riwei i pa, “Rava anatapui e baibaiem.”

³⁸ Iesu i paribelei i pa, “Tana nae taon ġelaui au ġereġere, ma kampa maiteni God Riwana Aiaina ana raugugulei. Tau wei lamna aubaina a nei.”

³⁹ Ma Galili au anatapuna i naeni ma pari au numai i raraugugula ma arua-apoapoei i viopuni.

*Iesu, oroto opi doriana i vilawani
(Matthew 8:1-4; Luke 5:12-16)*

⁴⁰ Anina ma rava awarina opi doriana, i nei Iesu awarina ma au naona i peu ma i raudune ma agu i vibagi i pa, “Mepa da ma ġoei, anina da ma viaiainiu.[‡]”

⁴¹ Ma Iesu nuabola orana i oai ma urana i viloloi da i vodadani ma i riwa i pa, “Anina a ġoegħoei, ma aii!”

⁴² Ma maratogogi opi-doriana, oroto i voterei ma tauna i aii me.

⁴³ Anina ma Iesu i riwana-guratei i pa,

⁴⁴ “Tam ma nae! Aiwai i tuputupua awarim, eġa rava ma vieġei! Ma jijimanina ma nae pirisi pulo tau apuna awarina ma vietataiana-melem

^{‡ 1:40:} Mai Jew ai Tarawatu e ririwa da rava lepeleperai, taui miramirai me dobu ġela ravai - *Jentail*. Mai Jew amapo nai ravai eġa ina vodadani. Rava miramirai eġa maiteni ina vitaparoro bo au melagai ina mae. Lamna aubaina mepa da rava miramirana i lawana, tauna ina ai-me, God tauna ina vaimelei ma rava maiteni ina mae ma ina taparoro.

ma viaiaina pulona Moses i ririweia ma kauei da ina vimataira taui awari! Pirisi pulo tauapuina ana vianina ina verei da tam u lawana.”

⁴⁵ Wate orotona i nae ma aiwai awarina i tuputupua lamna melagai au anatapuna i babaniana-naiei. Ma lamna aubaina Iesu melagai anatapui i vorei ma mepa ega rava ita mamaelana kampa i nae. Wate rava mepa maemaei i nei Iesu awarina.

2

*Iesu, oroto gwāgagwāgana i vilawani
(Matthew 9:1-8; Luke 5:17-26)*

¹ Iesu ana tauvotāgotāgo maiteni i wanavira-melei au Capeniam. Ma au pom ruāga au murina, rava nolana i nonori da tauna i nememei au melagai.

² Ma rava māgamāgau i vitagogie i au numa. Patara i rata guratana da numa i oai ma metaeta maiteni i mae-potai. Iesu, God riwana i raraugugulei.

³ Nelara ruāga ma ruāga, oroto gwāgagwāgana rasirasiei i avarai da i neiai Iesu awarina.

⁴ Rava i māga guratana ma ega tagotagogina da ita neiai Iesu awarina, lamna aubaina da tetelei i am̄gaena da au poewa ma gavogavo i bauni ma kampa gwāgagwāgana ana rasirasina i tere-̄gairei Iesu au naona.

⁵ Ma Iesu, nai ravai i 'nanai da ai vitumāgana i rata, lamna aubaina gwāgagwāgana i riwei i pa, “Natu, am̄ gō'apoapoei, a nota-tawanei.”

⁶ Anina mai Jew ai tarawatu babadai ̄gelaui kampa i kiakiala, au orai i vinua-notanota i pa,

⁷ “God ainelana gō'apoapoei e notanota tawanei. Aiwai aubaina wei ravana nanare e bababani?

Tauna, God e vivijiboġi ma e ririwa da tauna, God nanare.”

⁸ Maratagogi, Iesu Aruanei ai nota i vaia ma i riwei i pa, “Aiwai aubaina wei kauai o vivinuanotenotei?

⁹ Metauna i telatela: ġwaġagwaġana ata riwei, ‘Am ġo’apoapoe a nota-tawanei.’ Bo ata riwei, ‘Ma vomairi, am animatave ma vaia ma ma babara?’

¹⁰ A ġoei da taumi ona aramanei da Rava Natuna au dobu ana rewapana e mamae da rava ai ġo’apoapoe ina nota-tawanei ma ina vilawani.” Ma gwaġagwaġana i riwei i pa

¹¹ “A riwem, ma vomairi, am animatave ma vaia ma ma nae au numa!”

¹² Orotona i vomairi ma maratagogi aravi i vaia ma i babara nae. Ma patara i raraubiga, i bana-kauei ma God i voepaepai ma i ririwa, “Tauai eġa melanai kaua wenanare ata inanai!”

*Iesu, Levi i kwatuei
(Matthew 9:9-13; Luke 5:27-32)*

¹³ Iesu, Capeniam i voterei ma Galili topana au gerana i bababara ana tauvotaġotaġo maiteni. Ma patara i nei awarina ma tauna God riwana viararamanana i vikarei.

¹⁴ Ma i verau-nae aburuna ma Apius* natuna Levi i ’nanai, ana bagibagi au gabuna i kiakiala ma tax i tamitami Rome gabemanina aubaina. Iesu i riwei i pa, “Ma votaġotaġoi!” Levi i vomairi ma i votaġotaġoi.

¹⁵ Tax tautami ma ġo’apoapoei ravai maġamaġaui, Iesu ma ana tauvotaġotaġo

* **2:14:** Eng. *Alphaeus*.

i votaḡotaḡoi. Ma anatapui, Levi ana au numa i kiala gogona ma i amam.[†]

16 Tarawatu Babadai ḡelaui lamna Pharisi, ma taui i 'nanai da Iesu *tax tautami* ma ḡo'apoapoe ravai maiteni i amam. Anina ma Iesu ana tau-votaḡotaḡo i riwei i pa, "Aiwai aubaina Iesu *tax tautami* ma ḡo'apoapoei ravai maiteni e amam?"

17 Ma maranai Iesu wei riwana i nononori ma taui i riwei i pa, "Rava lawalawai, doketa eḡa ita ḡoeḡoei ma rava doridoriai, doketa e ḡoeḡoei. Tau a nei ḡo'apoapoei ravai aubai ma eḡa rava jijimani aubai."

Uji vitaraviravirana

(*Matthew 9:14-17; Luke 5:33-39*)

18 Mara tagogi, John Taubabataito ma Pharisi ai tauvotaḡotaḡo i ujiuji. Ma rava ḡelaui i nei Iesu awarina ma i vitara-virevirei, "Aiwai aubaina John Taubabataito ma Pharisi ai tauvotaḡotaḡo e ujiuji, wate tam am tauvotaḡotaḡo eḡa ita ujiuji?"

19 Iesu i paribelei i pa, "Taumi o notanotai da taui aiavoi i raukwatuei tavine ana au torela, ina mae lota bo? Eḡateni kaua! Maranai tavitavine vou orotona, taui maiteni e mamae, taui eḡa ina uji.

20 Wate mara ina ḡeta maranai tavitavine vou orotona ina vaitawanei ma lamna maranaina ana rava ina uji."

21 Ma riwa e mamae, "*Tau kaua vouna a neiai eḡa me taumi ami kaua wadubona nanare.* Eḡa aiai

[†] **2:15:** Moses, BADA ana Tarawatu i girumi ma mai Pharisi wei Tarawatuna i votaḡotaḡo-kauei. Ma taui kaua waduboi amamai ḡariei maiteni i vovoteletelei ma i riwa da aiavoi Tarawatu eḡa ita voteletelei lamna taui rava apoapoei, ḡo'apoapoe tau kauuei.

ravana, gara vounei gara au wadubona ina poporatui da gavogavo ina vopotai. Mepa da nanare lamna, gara vouna gara wadubona ina roroi ma gavogavo ina rata.

²² Ma nanare, ega aiai *wine* vouna ina vaini da *wine* aniterenana wadubona gamogamo opinei au orana ina iwaġi. Mepa da ina kaei, lamna *wine* vouna ina dodo ma *wine* aniterenana wadubona ina viairoroi ma *wine* ma aniterenana ina wanabauni[‡]. Wate *wine* vouna, anina da *wine* aniterenana vouna au orana ina iwaġi.”

*Iesu ana riwa Sabat aubaina
(Matthew 12:1-8; Luke 6:1-5)*

²³ Mara tagogi au Sabat, Iesu ana tauvotaġotaġo maiteni, *witi* wapuna au orana i nena. Ma ana tauvotaġotaġo *witi rovei* i vaini ma i amam.

²⁴ Pharisi ġelaui i 'nanai wei kauana i kaukuei ma taui Iesu i riwei, “Ma inanai, ata Tarawatu e mamae da Sabat, lamna lauvitau ana mara. Aiwaī aubaina taui e vovobagibagi?”

²⁵ Iesu i paribelei i pa, “Me peroveta i girugirimia nanare. David ana tauvotaġotaġo maiteni amiraġe ma aiwai i kauie? Taumi o iavi ma aiwai aubaina anona, ega ota vinua-notenotei?

²⁶ [◊]Pirisi Ĝeġetelarana Abiathar ana au mara, David, God ana au numa i rui ma palawa vovivirana i vaia ma ġelaui ana tauvotaġotaġo maiteni i verei da i ani. Moses ana Tarawatu e mamae da pirisi ava palawana e aniani.”

[‡] **2:22:** Wine e tuputupua ma puropurona wine ana aniterenana ina viaisikasikai [◊] **2:26:** 1Sa 21:1-6

²⁷ Ma Iesu ana riwa au damona i riwa i pa, “God, Sabat i kauei da rava voaguna aubaina ma ega rava ita kauei Sabat voaguna aubaina.

²⁸ Ona vinuanotenotei, tau Rava Natuna, lamna aubaina tau anina Sabat badana.”

3

*Iesu, Oroto urana irairaġena i vilawani
(Matthew 12:9-14; Luke 6:6-11)*

¹ Mara ġelauna au Sabat, Iesu i naeme au pari numana ma oroto urana irairaġena i 'nanai kampa i kiakiala.

² Ma Pharisi ġelaui i ġoei da aiwaiei Iesu ita viwavui. Lamna aubaina i 'nana-taġotaġoi da oroto ita vilawani bo ega au Sabat.

³ Ma Iesu, orotona i riwei, “Ma nei, au naoi ma mairi!”

⁴ Ma Iesu, ravai i vitara-virevirei i pa, “Sabat au marana, metauna i aii: Aiaina tana kauei bo apoapoen? Tana vilawana bo tana viraġena? Tarawatu aiwai i riwei?” Ma anatapui i genuana.

⁵ Iesu ana amloġaiġaina i 'nana viravira ma i 'nanai da taui orai i bado ma nuanuana i bolakaei. Ma orotona i riwei i pa, “Uram ma viloloi!” Ma i viloloi ma i lawana.

⁶ Ma Pharisi maratagogi i opu ma i nae Herod ana rava awarii* ma ai oga i tarai da Iesu mena ita viraġenanei.

Iesu, Patara awari i babani

* **3:6:** *Herod ana rava* anona lamna mai Jew ai boru, taui aiavoi Rome gabemanina i vovoagui. Taui ai bada wavalatona Herod Antipas. Mai Jew maġamaġau ma mai Pharisi maiteni, i notai da Herod ana rava taui tauvibenabenam ai rava au oienā awarii.

7-8 Iesu ana tauvotaḡotaḡo maiteni, taui i netawanei ma i nae au gera da ita vilauvitau; ma mai Galili patara ḡaegaena i votaḡotaḡo. Rava maḡamaḡaui, Iesu aiwai i kaukaueia nolana i nonori ma mai Galili ma Judea, Jerusalem taon, Idumea ma taon ġelaui waira Jordan taon au babagelauna, Taia taon ma Sidon taon,[†] taui anatapui i nei Iesu awarina.

9-10 [◊]Iesu, rava maḡamaḡaui i vilawani. Ma lamna aubaina doridoriai maḡamaḡaui i viviamdudu ma i ġoei da tauna ita vodadani. Lamna aubaina ana tauvotaḡotaḡo i riwei da waga i vokaukauei.

11 Maranai, arua-apoapoei rava au orai mae-maei, Iesu i 'nanai ma au naona i peu ma i garara, "Tam God Natuna!"

12 Ma Iesu taui i viḡaei da avena ita vieḡa da tauna aiai.

*Iesu ana Apasol 12 i vinei
(Matthew 10:1-4; Luke 6:12-16)*

13 Anina ma Iesu i ġae au ola ma ana ġoanei nanare, rava i kwatuei da awarina i ġei.

14 Tauna, nelara 12 i vinei da maiteni ita mae ma muriai ita paritawanei da ita raugugula. Ma i ġorei *Apasol*.

15 Ma i vovai-virewapani da arua-apoapoei rava au orai ina viopuni.

16 Taui i vinevinei 12 ai wava wenanare, Simon i ġoreġoreia Peter[‡]

[†] **3:7-8:** Eng. *Tyre & Sidon*. Wei ravana eġa mai Jew. [◊] **3:9-10:**
Mrk 4:1 [‡] **3:16:** Anona Ġaima.

¹⁷ ma Zebedi§ natuna James ma ana tevera John i ġorei Boaneges, anona waiparara natu-natuna,

¹⁸ Andrew,

Philip,

Batolomeo,*

Matthew,

Thomas,

James, tauna Apius† natuna,

Thadeus,‡

Simon, tauna Ununurana,§

¹⁹ ma Judas Iskariotei; * tauna, Iesu tauviben-abenameina.

Rava i riwa da arua-apoapoei Iesu e vivibadei.

(Matthew 12:22-32; Luke 11:14-23; 12:10)

²⁰ Ma Iesu ana tauvotaġotaġo maiteni i rui au numa. Ma patara i rieiai da taui eġa tagotagogina da ita am.

²¹ Ma Iesu ana numa ravai nolana i nonori ma i riwa i pa, “Tauna i bua.” Lamna aubaina i nei da ina taravaini.

²² Tarawatu babadai ġelaui Jerusalemei i nei ma i riwa i pa, “Arua-apoapoei, ai bada Bielsibul,† Iesu au orana i rui ma lamnei arua-apoapoei e viviopuni.”

§ **3:17:** Eng. Zebedi. * **3:18:** Eng. Batolomeo. † **3:18:** Eng. Alphaeus. ‡ **3:18:** Wavana ġelauna Judas - Luk 6:16

§ **3:18:** Anona lamna taui mai Jew ma taui Rome e viviġavie.

* **3:19:** Iskariot, lamna Judas ana melagai wavana da auna lamna Iskariotei. † **3:22:** Eng. Beelzebub. Anona lamna, *nabugara ai bada*.

²³ Lamna aubaina Iesu, wei Babadai i ġorei ma awanainei i pa, “Satan amapo Satan eġa ina viopuni.

²⁴ Mepa da dobu ravai ina viġavia vivira, lamna dobuna ita mae ava.

²⁵ Ma nanare dam ina viġavia vivira, nai damna ita mae ava.

²⁶ Ma Satan ita vomairi ma ita viġaviana-melei, amapo ita mae ava.

²⁷ Taudanene amapo eġa rava virewapanana ana au numa ina danene, eġa da au naona ravana ġuravei ina raġini ma muriai ina danene.

²⁸ Riwa kaua a ririwemi da God ami ġo'apoapoei ma ami vijiboġa anatapui ina nota-tawanei.

²⁹ Wate aiai da Arua Vivivireina e vivijibogħi, God, nai ravana ana ġo'apoapoei eġa melanai ina nota-tawanei ma ana ġo'apoapoe ina mae-nonoa.”

³⁰ Iesu wenanare i babani, aubaina rava ġelaui e ririwa, “Iesu au orana arua-apoapoei e mamae.”‡

*Iesu ana dam oina
(Matthew 12:46-50; Luke 8:19-21)*

³¹ Iesu alona ma varevareina i nei ma au doa i maimairi ma riwa i paritawanei Iesu awarina da ita nei.

³² Ma patara Iesu i kiala kwaviviroi, ma tau-pariverena i riwei i pa, “Alom ma novunovum ma varevareim au doa ma e ġoegħoem.”

³³ Iesu i paribelei i pa, “Aiai alou ma aiavoi vare-vareiu?”

‡ **3:30:** Tarawatu tau girumi i parivajjigei aubaina tau i ririwa da Arua Vivivireina ana nola lamna baravu da parauma. BADA eġa melanai ai ġo'apoapoei ina nota-tawanei.

³⁴ Anina ma taui i kiakiala i 'nanai ma i riwa i pa,
“Ona inana! Wei taui alou ma varevareiu.

³⁵ Aiai God ana ġoana e kaukauei, tauna alou ma novu ma vareiu.”

4

*Doa tapuna ma tapuna ai awanaina
(Matthew 13:1-9; Luke 8:4-8)*

¹ Iesu, giu i raukarena-melei Galili topana au adana. Ma patara i riei da ita rautaniġanei. Ma patara i rata, da tauna au waga i geru ma i kiala ma waga i dudui da i viraupu au topei ma patara au gera i mae.

² Ma kaua maġamaġaui awanainei i giu ma i viararamana i pa,

³ “Ona rautaniġana! Taupaewa, ana wapu i vokaukauei ma pei i ravi awawari.

⁴ Pei ġelaui au eta i peu. Ma kiu i ġeta ma i ani.

⁵ Ma pei ġelaui doa au ġaiġaimana i peu, doa au avavana. Ma lamna aubaina maratagogi i gogo.

⁶ Wate maranai madeġa i rarani, maratagogi i poi, anona warami eġa ita ġaira guratana doa au orana.

⁷ Pei ġelaui, modu donadonai au poui i peu. Ma modu donadonai i gogo ma pei i gogogo i lavani, ma eġa ita ua.

⁸ Ma pei ġelaui doa au aiaina i peu ma i gogo kaua ma i ua, ġelaui 30, ġelaui 60 ma ġelaui 100.”

⁹ Ma Iesu i riwa i pa, “Mepa da taniġami e mamae, riwa ona nonori!”

*Aiwi aubaina Iesu awanainei i babani
(Matthew 13:10-17; Luke 8:9-10)*

10 Maranai Iesu ainelana i mamae ma ana tau-votaḡotaḡo 12 ma taurautaniḡana ġelaui i ḡeta ma Iesu i vibāḡai da awanaina anona ita riwei.

11 Ma Iesu i paribelei i pa, “God ana vigulau ana kaua mamae govaḡana; taumi i vieḡemi ma rava au tano maemaei, taui aiwai anatapui awanainei e paripari-verei.

12 Lamna ana kauei da wariaḡa peroveta aiwai i girugirumia ina tupua:

“Taui ina inana ma eḡa ita inainanai.

Taui e rarautaniḡana ma eḡa ita araramanei; ma lamna aubaina taui eḡa ita nenei God awa-rina
da ai ḡo’apoapoe ita notatawanei.” *(Isaiah 6:9-10)*

Doa tapuna ma tapuna anoi.

(Matthew 13:18-23; Luke 8:11-15)

13 Anina ma Iesu i riwei i pa, “Wei awanainei a babani ma anona eḡa ota aramanei bo? Ma awanaina ġelaui menanare ona aramananei?

14 Taupaewa, God riwana, rava anatapui e paripari-verei.

15 Rava ġelaui orai i bagibagi me etanai. Riwa au tepana e raurauei, wate maratagogi Satan e nenei da riwa rava au orai e vaivai-tawanei.

16 Ma rava ġelaui orai me doa viḡaḡaimana. Taui, riwa i nonori ma maratagogi ana nuaiaii riwa e vaivai.

17 Wate warami eḡa da eḡa ita mamae guratana. Ma maranai nuabola bo rau-iviapoapoe e nenei taui awari, aubaina taui ai tumaḡana God awarina e tereterei. Taui maratagogi e peupeu.

18 Rava ġelaui orai me pei, modu donadonai au orai e gogogolana. Taui anina riwa e nononori.

19 Wate lawana ai nuabola ma mane ai nuavainana ma kaua ġelaui ai au nuaiai e ruirui ma God riwana e lavalavani da eġa ita uaua.

20 Ma ġelaui, taui me pei doa au aiaina i peu. Taui, lamna anina riwa e nononori ma e vaivai-kauei ma e uaua: ġelaui 30 ma ġelaui 60 ma ġelaui 100.”

21 Iesu i riwei i pa, “Rava, eġa rampa ita neineiai da iriga au gabaurina ita tereterei bo vatara au gabaurina ta pa? Rampa ana au anikiala e tereterei ta pa?

22 Kaua mamae govaġgai, anataputapui a vieġgai ma kaua govagovaġgai nanarena ana vieġgai.

23 Mepa da taniġami e mamae, riwa ona nonori!”

24 Iesu i riwa i pa, “Aiwai o nononoria ona rautaniġanana-kauei, ruva o ruveruveia, God nanare awarimi ina ruvai ma ġelauna ina tavipotoi.

25 Lamna aubaina, mepa da riwau ona aramanei, tau ġelauna ma ġelauna ana veremi. Ma taui eġa ita aramanei, lamna aiwai aburuna i nononoria, ina vine-boai.”

Pei gogogona ana awanaina.

26 Iesu e ririwa i pa, “God ana vigulau me rava, *witi* peina au doa ita ravi-awawari.

27 Ma waguvvara e matamatave ma maratom e vovomairi ma pei e gogogo ma e rarata. Wate aiwaiei e gogogo, tauna e vivinuanainei.

28 Doa ana nuaina, pei me *witi* e vivigogoi ma e uaua. Au naona e raraupairei ma muriai e roverove ma muriai anona e magumagura au tapina.

29 Maranai i magura, rava petona e raraukarei. Tu-aruta marana i ġetai.”

*Pei aburuoina ana awanaina
(Matthew 13:31-32, 34; Luke 13:18-19)*

30 Iesu i riwa i pa, “God ana vigulau aiwaei ana parivai-patepatei bo aiwai awanainei ana pariveremai?

31 Wenanare, wei aina peina, lamna me gaga peina, pei aburuoina au dobu ma au doa i paewi.

32 Ma peina i gogo ma i rata da ai muomuoi i ġetawanei ma raġaraġai ġaegħae i terei ma au ġoui, kiu ai noġi ita voai.”

33 Ma Iesu, awanaina maġamaġgħau, rava au matai i raugugulei da taui ai rau-taniġana ana au ruva nanare.

34 Awanainei, rava awari i giugiu, wate ana tau-votaġo ava awari kaua anatapui i vivieġġai.

*Iesu, kojikojira i ravi-daumorai
(Matthew 8:23-27; Luke 8:22-25)*

35 Nai aubigaina Iesu, ana tauvotaġo i riwei i pa, “Tana damana topa au baba ġelauna.”

36 Anina ma taui patara i voterei. Ma anatapui Iesu, maiteni au waga i geru ma i damana, waga ġelauui maiteni.

37-38 Iesu, waga au murina unutana i terei ma i raunuavuru. Ma kojikojira ġaegħaena i tupua ma rabama, waga au tepana i raurauei ma waira, waga i oaoai. Ma ana tauvotaġo, tauna i ravidagħgui ma i riwei i pa, “Taugiu, nuanuam e bolabolai bo eġa da tana iraġe?”

39 Ma tauna i vomairi ma ive i viġġaei ma i riwei i pa, “Ma genuana!” Ma rabama i riwei i pa, “Ma mae-genuatau!” Ma ive i wanatuini ma daumora ġaegħaena i matave.

40 Iesu ana tauvotaḡotaḡo i riwei i pa, “Aiwai aubaina o rovorovo? Taumi amapo da eḡa ota vitumaḡana!”

41 Ma taui i rovo kaua ma i riwa vivira i pa, “Wei aiai ravana da ive ma rabama tauna e vovoteletelei?”

5

Iesu, arua-apoapoenā oroto awarina i viağaḡana-opunei.

(Matthew 8:28-34; Luke 8:26-39)

1 Iesu ana tauvotaḡotaḡo maiteni Galili topana au baba ġelauna i ġeta, mai Gerasa ai au dobu.

2 Wei au dobuna, arua-apoapoenā oroto au orana maemaena.

3-5 Eḡa aiai tagotagogina da ita vovaiubai. Mara maḡamaḡauna, aena ma urana seinei i pani. Wate wei i viaituituini, ma eḡa tagotagogina da seinei ita pani. Marai ma waguvvarai i nene-labalababa ma i garagarara ma ḡaimei tupuana i boribori-melei ma au kokoaga ma au ola i raunuma.

6 Maranai Iesu wagei i opuopu, arua-apoapoei orotona i riuuinia, aueia Iesu i 'nanai ma kokoagei i ruba ma Iesu au naona i mae-peu ma i raudune.

7-8 Iesu, ravana i riwei i pa, “Arua-apoapoenā, wei orotona ma opu-tawaneii!” Ma orotona, ponana au aidamo ma i garara, “Iesu, God Aidamo Telarana Natuna! Aiwai awariu e ḡoeḡoei? God wavanei a vivibaḡaim da eḡa ma kovoḡiu!”

9 Iesu, orotona i vitara-virevirei i pa, “Tam wavam aiai?”

I paribelei i pa, “Tauai a māga, aubaina tau wavau lamna Āavia Patarana.”

¹⁰ Ma arua-apoapoei, Iesu i vibāga-guratei da avena nai dobunei ita viopuna-tawanei.

¹¹ Ma poro boruna āgaēaena au āgerēgere ola au adana i labalaba.

¹² Ma arua-apoapoei, Iesu i vibāgai, “Ma paritawanelai poro au orai ana rui.”

¹³ Iesu i vianina. Ma arua-apoapoei, orotona i opu-tawanei ma poro au orai i rui. Poro boruna 2,000 nanare olei i ruba āgaira da au topa i monu.

¹⁴ Ma poro taupainii i ruba nae au melagai ma au wapu; ma riwa i vibabarai. Ma rava i nei da ita inanai aiwai i tupua.

¹⁵ Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i oteni ma ana nota jijimanina. Ma taui i rovo kaua.

¹⁶ Ma aiwai i tupua orotona ma poro awari, taui i 'nainanaia, rava i riwana-naiei.

¹⁷ Ma dobuna ravai, Iesu i vibāgai da dobuna ita oputawaneii.

¹⁸ Iesu au waga i gerugeru ma orotona, Iesu i vibāgai i pa, “Tau maiteni tana nae.”

¹⁹ Iesu i vīgaei ma i riwei i pa, “Ma naeme am au dam. Ma BADA kaua aiwai āgaēaena i kaukaueia ma ana iviaiai tam awarim, taui ma pariverei.”

²⁰ Ma anina orotona, Iesu i netawanei ma i nae au Dekapolis (*melagai 10*) da Iesu aiwai awarina i kaukaueia, rava i riwana-naiei. Ma taui anatapui i nononoria i baiei.

Iesu, Jairus natuna wavinena ma wavine doridoriania i vilawani.

(Matthew 9:18-26; Luke 8:40-56)

²¹ Iesu wagei i damana me topa au baba ġelauna. Maranai kampa i ġeta ma topa au adana, ma patara i rieiai.

²² Pari numana badana wavana Jairus i nei weka ma maranai Iesu i 'nanai, tauna Iesu au aena i mae-peu

²³ ma i vibaġa-guratei i pa, "Natu guguinina e irairāġe. Ma nei ma uram au inina ma terei ma ina lawana."

²⁴ Anina ma Jairus, Iesu maiteni i nae ma patarana i mae gariġuruvi ma i votaġotaġoi.

²⁵ Wavine tagogi kampa patarana au orana awarina tara-doriana i mae da madęga 12 i kwa.

²⁶ Ana mane anataputapuna, dokedoketa maġamaġaui awarii i tawanei ma eġa tagotagogina ita vilawani ma amapo da ana doria i rarata.

²⁷⁻²⁸ Tauna, Iesu nolana ma ana babani i nonori ma au orana i vinua-notanota i pa, "Mepa da ana gara ava ana vodadani ma ana lawana." Ma tauna, Iesu murinei i nei ma ana gara i vodadani.

²⁹ Maratagogi, tara-doriana i wanatuini ma malana i vaia da i lawana.

³⁰ Nai maranaina, Iesu malana i vaia da ana rewapani i opu-tawanei ma i mae-tavirei patara au poui ma i riwa i pa, "Aiai au gara i vodadani?"

³¹ Ana tauvotaġotaġo, tauna i riwei, "Ma inanai, patara i mae gariġuruvim! Ma menanare da u riwa 'Aiai i vodadani?'

³² Wate Iesu i 'nana viravira da ita inanai aiai i vodadani.

³³ Wavine i rovo kaua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapui i viēgei.

³⁴ Anina ma Iesu, wavine i riwei i pa, “Natu, am tumāgana i vilawanim. Am doria i kwa, ana nu-aubam ma nael!”

³⁵ Maranai i bababani ma rava ġelaui Jairus ana numei i nei ma i riwei i pa, “Natum ana mara i kwa. Eġa Taugiu ma visina-viravirai.”

³⁶ Iesu ai babani i nonora-tawanei ma Jairus i riwei i pa, “Eġa ma rovo, ma vitumāgana!”

³⁷ Iesu, rava ġelaui i viġaei ma Peter ma James ma ana tevera John maiteni i nae.

³⁸ Ma Jairus ana au numa i ġeta ma Iesu, patara i ’nanai; i toutou ma i taratarakwatu

³⁹ ma i rui ma taui i riwei i pa, “Aiwai aubaina o taratara-kwatu ma o toutou? Tevera eġa ita iraġe, tauna e matamatave ota.”

⁴⁰ Ma taui, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotaġo tonuġa maiteni i rui mepa tevera i matamatave lana.

⁴¹ Iesu, tevera nimana i vaia ma i riwei i pa, “*Talitha koum!*” wei anona, “Kukuma, ma vomairi!”

⁴² Maratagogi i vomairi ma babara i vikarei (Tauna ana madeġa 12). Ma taui i ba kaua.

⁴³ Iesu, taui i riwana-guratei da eġa aiai ita viēgei ma i riwa da ita viambagibagi.

6

Mai Nasaret, Iesu i parivirevirei

¹ Iesu ana tauvotaġo maiteni nai dobuna i netawanei ma i naeme ana au melagai.

² Ma Sabat marana i ġeta ma tauna giu i vikarei au pari numana. Ma rava maġamaġaui i riei da i rautaniġanei. Taui anatapui i baiei ma i vitara-viravira vivira i pa, “Wei tauna nuaulaula ma aramanana mepa i vaia?” Ma, “Kaua aiwaiei e kaukauei?”

³ Anina ma taui ava i babani vivira i pa, “Tauna tauvoa. Mary ana natuevou ma varevarena James, Joses, Judas ma Simon ma novunovui weka e mamae tauna bo?” Ma lamna aubaina mai Nasaret, Iesu i parivirevirei.

⁴ Iesu, taui i riwei i pa, “*Peroveta* dobu au ġelaui e vivivirei, wate ana au melagai, ana rava ma ana dam oina, eġa ita vivivirei.”

⁵⁻⁶ Tauna i baiei da rava eġa tauna ita vitumaġanei. Ma eġa tagotagogina da kaua vivirewapanai kampa ita kauei. Tauna urana, rava ruāga ota doridoriai au tepai i terei ma i vilawani. Ma muriae, melagai nununai au ġereġerei i viararamana nae.

Iesu ana Apasoli paritawanei da ita viararamana

⁷ Ma Iesu, taui 12 i ġoreiai ma ruaruāgei ava i paritawanana-opunei ma rewapani verei da arua-apoapoei ina viaġaġana-opunei.

⁸ Ma riwa bagibaginei i riwei i pa, “Ami au vaġai, eġa aiwai ona vaia anina jiġona ava; eġa lam, eġa autu bo mane au urami.”

⁹ Ae uma ona oteni ma eġa kwama ġelauna ona vaia.”

¹⁰ Ma i riwei i pa, “Metauna melagaina o ruiruiana ma i vianinemi. Numa tagoginina au orana ona mae da melagaina ona oputawanei.”

¹¹ [✳]Mepa da au melagai o ġeta ma rava

✳ **6:11:** Act 13:51

ēga ita vianinemi bo ēga ita rautanīganemi. Nai melagaina ona oputawanei ma aemi pokauna ona rauabuabui da ina aramanei da taui ai wavu!**

¹² Ma taui i opu ma rava awari i raugugula ma i riwei i pa, “Taumi ami ġo’apoapoei ona voterei ma ona mae-taviremi God awarina!”

¹³ Taui, arua-apoapoei i viaġaġana-opunei. Ma rava doridoriai maġamaġgau, olive oirana au kolai i buloi ma i vilawani.

John Taubabataito ana iraġe

¹⁴⁻¹⁶ ⋆ Iesu nolana i nae da rava anatapui i aramanei ma tauna i babaniei. Ma rava ġelau i ririwa i pa, “Tauna, kaua vivirewapanai e kaukauei, aubaina tauna John Taubabataito iraġelei i vomairi me.” Ġelau i ririwa i pa, “Tauna Elijah i nememei.” Ma ġelau i ririwa i pa, “Tauna peroveta wariaġai nanare.” Ma gulau Herod,[†] nolana i nonori ma i riwa i pa, “Tau, John Taubabataito uana a borituini; marina i vomairi me.”

¹⁷⁻²⁰ John ana virarautua, lamna wenanare. Muriai da Iesu ana viararamana nolana ita vikarei. Herod, tuana Philip awana i kwalei ma i ravagi. Wavinena wavana Herodias. Au murina John, Herod i riwana ġirigiriei i pa, “Tarawatu e mamae da ēga vareim awana ma kwalei.” Ma Herod, riwa

* **6:11:** Wariāga mai Jew, tauvaġai e nemememei au Israel. Taui au aei pokau e raraubuabui maranai Israel ana au parata e ġeġeta, lamna taui orai e viaiaini. Ma Iesu ana tauvotaġotaġo wei i kauei da melagai ravai ina notai, “Tauvotaġotaġo e ririwa da tauta orata apoapoena me tauta ēga mai Jew.” ⋆ **6:14-16:** Mrk 8:28

† **6:14-16:** Herod Antipas, Galili ana Wavalatona.

i paritawanei da John i pani da panipani au numana i terei. Herod ana nuaiaina, John i rarautaniāganei. Wate nuanuana i rağarağga.

Ma Herodias, John awarina amlona i ġaiġai ma virägenana i ġoei. Herod i aramanei da John, lamna rava jijimanina ma vivivireina ma i gagaloei. Herod, John i rovoei ma lamna aubaina wavinena eğä tagotagogina da aiwai ita kauei.

21 Ma wavine, gavogavo i 'nanai, maranai Herod ana tupua marana i ġeta ma torela i vokaukauei. Ma gabemani babadai ġaeğaei ma sorodia ai babada ġaeğaei ma Galili babadai i raukwatuei.

22 Ma Herodias natuna wavinena i nei ma i ara. Herod ma taui maiteni i amam i vinuaiaini. Ma gulau, guguini i riwei i pa, “Aiwai u ġoegħoeia ma vibağai ma ana verem!”

23 Ma i parivainuağani i pa, “God au matana a ririwem da aiwai u vivibağei ana verem da au vigulau navanavana au paratana.”

24 Ma tevera wavinena i opu ma alona i paridadanei i pa, “Aiwai ana vibağei?”

Ma i paribelei i pa, “John Taubabataito kolana.”

25 Ma maratagogi i vipaparana ma gulau awarina i rui ma i vibağai i pa, “A ġoegħoei da marina John Taubabataito kolana ma vereu au aboma!”

26 Ma gulau nuanuana i bola-kauei. Wate parivainuağana boibogħi i kauei taui i amam au matai. Ma lamna aubaina guguini, aiwai i vivibağei anina i vianinei.

²⁷ Ma tauviraġena i paritawanei ma i riwei da John kolana ita neiai. Ma i nae panipani au numana ma John uana i borituini.

²⁸ Ma kolana au aboma i terei ma guguini i verei ma guguini, alona i verei.

²⁹ Ma John ana tauvotaġotaġo, nolana i nonori ma i nei ma taubeuna i vaia ma au kokoaga i vimataveni.

Iesu, nelara 5,000 i viambagibagi

(Matthew 14:13-21; Luke 9:10-17; John 6:1-14)

³⁰ Apasol i ġeta memei ma aiwai anataputapuna i kaukauei ma i raraugugulei, Iesu i vieġei.

³¹ Lamna maranai, rava maġamaġaui i nenei ma i nena da Iesu ana tauvotaġotaġo maiteni eġa gavogavo ita maemae da ita am. Lamna aubaina Iesu, taui i riwei i pa, “Taumi ava ona nei ma tana nae au mutulua da laumi ina tau mara aburuna.”

³² Ma anatapui wagei i nae au mutulua.

³³ Wate rava maġamaġaui i ’nanai i nena da i aramanei taui aiavoi. Ma melagai nununai anatapui geraei i ruba gogona da au dobuna i aigeta.

³⁴ Maranai Iesu wagei i tuopu au gera ma patara ġaegħena i ’nanai ma nuanuana i bola-kauei. Taui me sипу ma eġa ai tauvipaipai. Ma Riwana Aiaina viararamanai i raukarei.

³⁵ Ma au biga e tuturiai ma ana tauvotaġotaġo i nei awarina ma i riwei i pa, “Wei mutulua ma madeġa e arearere.

³⁶ Rava ma paritawanei da ina nae au melagai ma au wapu au ġereġere da ai lam ina gimarai.”

³⁷ Wate Iesu i paribelei i pa, “Taumi ona viambagibagi!” Ma taui i paribelei i pa,

“Mepa 200 *denarii*[‡] tana vaia da wei patarana tana viambagibagi?”

³⁸ Ma Iesu i paridadanei i pa, “Palawa biāga awarimi? Ona nae ma ona baiei!”

Maranai i nelaḡai ma i riwa i pa, “Awariai, palawa five ma iana ruaḡa.”

³⁹ Anina ma Iesu, patara i riwei i pa, “Boru nununai, gidagida au majimajīgai ona kiala nae.”

⁴⁰ Ma taui ai au boru 50 da 100 nanare i kiala nae.

⁴¹ Ma Iesu, palawa five ma iana ruaḡa i vaia ma i ḡoutata au mara ma God i viegualaei. Ma palawa i vogimagimai ma iana i ḡutai da ana tauvotaḡotaḡo i verei ma taui, rava i verei.

⁴² Ma patara i am ma i am-iaua.

⁴³ Ma ana tauvotaḡotaḡo, lam am tereterenai i tuarui da poa muomuoi 12 i vioai.

⁴⁴ Nelara 5,000 i viambagibagi.

Iesu, waira au tepana i babara

(Matthew 14:22-33; John 6:15-21)

⁴⁵ Anina ma Iesu, ana tauvotaḡotaḡo i egari da ita aidamana au Bethsaida.[§] Taui au waga i geru da i nenaе ma tauna, patara i paritawanei.

⁴⁶ Patara i paritawanei ma tauna ava i ḡae au ola da ita raupari.

⁴⁷ Ma waguvara ana tauvotaḡotaḡo au waga au topa ma Iesu au alala.

⁴⁸ Ma ana tauvotaḡotaḡo, lare i vovoguratei da ita ḡota wate ive i viraumatamatani. Ma maratomtom nanare, Iesu i nae awari. Tauna waira au tepana i bababara ma i ḡoei da taui ita tutelarei.

[‡] **6:37:** 200 denarii. Denarius tagogi lamna taubagibagi ai maia au pom tagogo nolana aubaina. [§] **6:45:** Eng. *Bethsaida*.

49-50 Ma maranai taui, Iesu i 'nanai topa au tepana i bababara ma i notai da tauna konāga ma i rovo kaukaua ma i vigaragararei. Ma maratagogi Iesu i riwa i pa, "Tepami ina tora! Tau, ēga ona rovo!"

51 Ma au waga i geru ma ive i wanatuini ma taui i bana-kauei.

52 Avena da kaua palawa awarina i kauei i 'nanai, wate ana rewapanā ēga ita aramana-kauei. Taui orai i bado ma i vinuanaina.

Iesu, rava doridoriai māgamāgaui au Genesaret i vilawani
(Matthew 14:34-36)

53 Taui, topa i damani ma au Genesaret i ̄gota ma ai waga i rāgini.

54 Taui, waga i oputawanei ma rava, Iesu i 'nanai ma maratagogi i aramanei da tauna.

55 Iesu nolana, Galili provins anatapui i naeni ma i nonori da tauna mepa i mamae. Ma kampa, doridoriai rasirrasie i vivaneiai.

56 Iesu mepa i nenenana, melagai ̄gaēgai ma muomuoi ma wapu mepa rava e mamae lana. Ma rava, ai rava doridoriai nai au melagaina i neiai au deba. Ma i vibāga, da doridoriai, Iesu ana gara adana ava ita vodadani. Ma aiavoi Iesu ana gara i vodadani i lawana.

7

Amamami ai giu
(Matthew 15:1-9)

1-4 Pharisi ma Jew anatapui, magumagura ai giu māgamāgaui e notanota-jijini. Taui, ai anima ma ai aniam anatapui e ōgaōgai lamnei taui

e viaiaina-melei God au matana. Ma maranai au maket da e nenei, urai ina ōgai ma ina am. Taui ēga ina am da au naona urai ina ōga kaei me ai magumagura ai giu nanare.

Maratagogi Pharisi āelaui ma Tarawatu Babadai, Jerusalem ei i nei Iesu awarina da ita rautaniāganei. Ma taui i 'nanai da Iesu ana tauvotaāgotaāgo āelaui, urai ēga ita ōgai ma i amam.

⁵ Ma taui, Iesu i vitara-virevirei i pa, "Aiwai aubaina am Tauvotaāgotaāgo magumagura ai giu, ēga ita votaāgotaāgoi ma ana ura miramirai e amam?"

⁶ Ma Iesu i paribelei i pa, "Taumi morumorumi ma o vikaua-aiaina-melemi. God ana peroveta Isaiah i riwa kaua maranai i riwa, i pa:

'Wei ravai ipiriei e vovoepaepaiu,
wate nuuanuai ueia.'

⁷ Taui rava ai giu e viiararamani.

Lamna aubaina ai voepaepa anona ēga.'
(*Isaiah 29:13*)

⁸ Taumi, God ana Tarawatu o teretere-tawanei ma ami giu o votaāgotaāgoi."

⁹ Ma i riwana-melei i pa, "Taumi o aramana kaua da God ana Tarawatu o gedugeduiae ma amamami ai giu o vovotaāgotaāgoi.

¹⁰ [✡]God ana Tarawatu, Moses i girugirumia nanare: *Amam ma alom ma vivrei ma Aiai amana ma alona e enaena-boai, tauna ona virāgeni.*

¹¹ Wate taumi o viararamana da aiai awarina mane bo purapura, amana bo alona ita voagui ma ita riwei, 'Awariu e mamae da ata voaguim; wate lamna *Corban* - a tereriei pulo, God aubaina.'

[✡] **7:10:** Exo 20:12; Exo 21:17

12 Wei viararamanana, taui e vivīgæi da amana ma alona ina voagui.

13 Ma wei taunei viararamana, rava awari o vividamani; ma God riwana o vivikwakwavi. Ma kaua maǵamaǵau i ǵelaui maiteni o kaukauei.”

*Metauna kauai, rava orai e vivimirai.
(Matthew 15:10-20)*

14 Iesu, patara i kwatuana-melei ma i riwei i pa, “Anatapumi ona rautaniǵaneu ma aiwai a ririwemi ona aramanei.

15-16 Aiwai au tanoei au orami e ruirui, lamna eǵa ita vivimiraimi ma aiwai da oramiei e opuopu, lamna e vivimiraimi God au matana.”*

17 Anina Iesu, patara i voterei ma i rui au numa. Ma ana tauvotaǵotaǵo, i vitara-virevirei da wei awanainana anona aiwai.

18-19 Iesu i paribelei i pa, “Taumi maiteni eǵa ota aramanei bo? Kaua aiwai au tano, rava au orai e ruirui amapo eǵa ina vimirai. Anona lamna wei kauai, eǵa ita ruirui rava au nuapouna, wate au manawana da e opuopu.” (Wei riwanei Iesu, lam anatapui i viaiaini).

20 Anina ma i riwa i pa, “Aiwai, rava oranei e opuopu; lamna, rava e vivimirai God au matana.

21 Anina rava nuanuanei vinuanotanota apoapoei e opuopu me: viawawana labalababa, danene, viraǵena, awadanene,

22 ambo, rau-iviapoapoe, moru, erawa, unura, terevaideǵa, mae-ǵaegae ma opa.

23 Wei kauai apoapoei anatapui oranei e opuopu ma rava e vimiramirai.”

* **7:15-16:** Giruma ǵelaui Mark uranei i girugirumia wei riwai wenanare e mamae, “*Mepa da taniǵami e mamae, ona rautaniǵana.*”

*Jentail wavine,[†] Iesu i vitumaḡanei
(Matthew 15:21-28)*

24 Ma dobuna i voterei ma i nae Taia ana au parata. Ma i rui govaḡa au numa ma eḡa ita ḡoei da rava ita aramanei da tauna kampa, wate eḡa tagotagogina da ita raugovaḡa.

25-26 Wavine tagogi, Iesu nolana i nonori ma i nei awarina. Tauna eḡa Jew ma Jentail au Phonisia i tupua, Siria ana au parata. Arua-apoapoena, tauna natuna wavinena aburuna i ruini; ma alona i nae Iesu au naona i mae-peu ma ma i vibaḡai da arua-apoapoena ita viopuni.

27 Iesu i aramanei da tauna Jentail; lamna aubaina i riwei i pa, “Eḡa ita ai da roaroa ai lam ata vaia da auou ata verei da au naona roaroa ina am-iaua.”‡

28 Ma wavine i paribelei i pa, “Bada, aiwai u riwei; lamna riwa kaua. Wate auou, roaroa ai lam momoḡina, kepakepa au gabaurina e rauraua e aniani.”

29 Ma Iesu wei i riwei i pa, “U paribelana kaua, aubaina ma nae au numa. Arua-apoapoena natum i opu-tawanei.”

30 Ma wavine i naeme au numa. Natuna wavinena i 'nanai i matamatave, arua-apoapoena boibogi tevera i opu-tawanei.

*Iesu, oroto taniḡa-potapotana ma mena birebirena
i vilawani*

† **7:23:** Rava eḡa mai Jew. ‡ **7:27:** Riwa roaroa wei au awanaina lamna mai Jew. Taui e notanotai da taui i ai guratana eḡa me rava ḡelaui. Lamna aubaina taui dobu ḡelaui ravai e ḡoreḡorei *auou*.

³¹ Iesu Taia ma Sidon ana parata i netawanei ma au babaġela Dekapolis i verautuini ma i nae au Galili topana.

³² Oroto taniġana potapotana ma menana bire-birena i neiae Iesu awarina ma i vibaġai da urana au inina ita terei da ita vilawani.

³³ Iesu, oroto i taravaina-opunei da taui ava ma ura-gigina, oroto au taniġana i terei ma ura-gigina ġelauna i ovai ma menana i vodadani.

³⁴ Nuanuana i bolai ma i ġoutata au mara; i lavutu tawanana ma oroto i riwei i pa, “*Ephatha!*” Wei anona, “Ma wanatawanei!”

³⁵ Maratagogi taniġana i wanatawanei ma menana i vidagudagu ma i babani kaua.

³⁶ Ma Iesu, taui i viġaei da aiwai i tuputupua, avena rava ita vieġei. Iesu, rava i viġaei; wate taui eġa ita rautaniġana ma riwa i vituai.

³⁷ Ma maranai ravai wei i nonori, taui i bana-kuae i ma i riwa i pa, “Aiwai anatapui i kauana-kuae. Tauna, rava taniġa potapotai e vivilawani da e rarautaniġana ma menabirebirei e bababani.”

8

*Iesu, rava 4,000 i viambagibagi
(Matthew 15:32-39)*

¹ Nai maranai, patara ġaegħena i riana-melei. Patara eġa ai lam. Ma Iesu, ana tauvotaġo i kwatuei da i nei ma i riwei i pa,

² “Au pom tonuġa patara maiteni a mae ma ai lam eġa ma a rau-nuapoapoelei.

³ Taui ġelaui, uamei i nei. Mepa da ana amiraġe ana paritawanei ai au numa, ma au etanai ina raumolaġau.”

⁴ Ma ana tauvotaḡotaḡo i paribeli i pa, “Wei mutulua ma mepa lam tana vaia da wei patarana tana viambagibagi?”

⁵ Ma Iesu, taui i paridadanei i pa, “Awarimi palawa biaḡa?”

Taui i riwa i pa, “seven.”

⁶ Ma Iesu, patara i riwei da au doa i kiala. Ma palawa seven i vaia ma God i viegualauei ma i vogimagimai ma ana tauvotaḡotaḡo i verei da patara i verei.

⁷ Ma taui awari, iana muomuoi ruaḡa ota. Iesu i vaia; God i viegualauei ma ana tauvotaḡotaḡo i verei da patara i verei.

⁸ Taui anatapui i am da i am-iaua. Ma lam am tereterenai i tuarui da poa ġaeḡaei seven i vioai.

⁹ Rava 4,000 i viambagibagi. Ma muriae i paritawanei ai au numa.

Pharisi, God ana mataira i vibagħi

(Matthew 15:39-16:4)

¹⁰ Maratagogi, Iesu ana tauvotaḡotaḡo maiteni au waga i geru ma i nae Damanuta ana au parata.

¹¹ Pharisi ġelaui i nei ma viparipariġai i vikarei Iesu maiteni. Taui i ġoei da Iesu ita raudadani da mataira Godei ita viatataiei.

¹² Iesu, Aruanei i lavutu tawanana ma i riwa i pa, “Wei kimta voui, aiwai aubaina mataira e ġoeġgoei? A ririwana-kauemi, amapo mataira eġa ona inanai.”

Iesu, ana tauvotaḡotaḡo I parivainotai

¹³ Anina ma Iesu, patara i netawanei ma ana tauvotaḡotaḡo maiteni au waga i geru me ma i damana Topa Galili au baba ġelauna.

14 Ma ana tauvotaḡotaḡo, nuanuai i vuru da ai palawa ita vaia ma palawa tagogi ava au waga i mamae.

15 Iesu, taui I parivainotai i pa, “Pharisi ma Herod ai giu ma ai viaramana morumoruna ona inanakaue! Lamna me *yist*.*”

16 Ma taui i babani vivira i pa, “Tauta eḡa ata palawa aubaina da e ririweta.”

17 Ma Iesu i aramanei ma taui i riwei, “Aiwai aubaina o bababani da taumi awarimi eḡa palawa? Taumi amapo da eḡa ota aramana ma o vivinuanaina? Orami i bado bo?”

18 ✧Matami e mamae ma eḡa ota inainana. Ma taniḡami e mamae ma eḡa ota nonora. Ma o vinuanotanota bo eḡa?

19 Maranai palawa five a vogimagimai rava 5,000 aubaii, lam am tereterenai o tami da poa biāga o vioai?”

Taui i paribelei, “Twelve.”

20 “Ma maranai palawa seven a vogimagimai rava 4,000 aubaii, lam am tereterenai o tami da poa ġaeḡaei biāga o vioai?”

Taui i paribelei, “Seven.”

21 Ma taui i riwei i pa, “Ma amapo da o vivinuanaina!”

Iesu, oroto mata apoapoenā i vilawani au Beth-saida

* **8:15:** Yist mai Jew awanainei lamna aiwai da apoapoe, mira bova e vinitua bo e vivimaḡai. Weka Iesu mai Pharisee ma mai Herod ai lawana ma ai giu morumorui e babaniei, da eḡa ina tua.

✧ **8:18:** Mrk 4:12

22 Taui i nei au Bethsaida ma rava ġelaui, oroto matana apoapoena i neiai Iesu awarina ma i vibaġa-guratei da ita vodadani.

23 Ma Iesu, oroto matana apoapoena i raunimavoi ma melagaiei i taravaina-opunei. Ma kampa matana i ovai ma urana au matana i terei ma i paridadanei, “Aiwai e inainanai bo eġa?”

24 Ma i taepai ma i riwa, “Rava a inainanai ma taui me ai ita bababara.”

25 Iesu, urana i tere-melei oroto au matana. Ma matana i wanatawanei da aiwai anatapuna i ’nankauei.

26 Iesu, tauna i paritawanei ana au numa ma i riwei, “Eġa ma nae au melagai! Wate jijimanina ma nae au numa.”

*Peter i riwa da Iesu, tauna Keriso
(Matthew 16:13-16; Luke 9:18-20)*

27 Iesu, ana tauvotaġo maiteni i nae melagaii Caesarea Philipai au ġereġerei. Maranai i nena e ma Iesu, taui i paridadanei, “Rava e ririwa; tau aiai?”

28 [✳]Ma taui i paribelei, “Ġelaui e ririwa da tam, John Taubabataito. Ma ġelaui Elijah. Ma ġelaui e ririwa da peroveta wariaġana tagogi.”

29 Ma Iesu, taui i paridadanei, “Wate taumi, mena o notanota-nei? O ririwa da tau aiai?”

Peter i paribelei, “Tam God ana *Messiah* - anona Keriso.”

30 Iesu, taui i viġaei da eġa aiai ina riwei da tauna aiai.

*Iesu ana iraġe ma ana vomairi me i babaniei
(Matthew 16:21-23; Luke 9:21)*

[✳] **8:28:** Mrk 6:14-15

31 Ma Iesu i raukarei da ana tauvotaḡotaḡo i giuni i pa, “Rava Natuna ina vinuapoapoe kaua. Ma dogadogara, pirisi babadai ma tarawatu babadai, tauna ina pari-geduaiei ma ina viraḡeni. Ma au pom tonuḡa au murina ina vomairi me.”

32 Iesu jijimaninei wei kauai i bababaniei ma lamna aubaina Peter, tauna i taravaini au ririva ma enana i vikarei.

33 Wate Iesu i mae-tavirei ma ana tauvotaḡotaḡo i ’nanai. Ma Peter i eni, i pa, “Satan ma nae au muriu! Tam am nota eḡa Godei ita nenei, eḡa da ravei.”

*Iesu votaḡotaḡona anona
(Matthew 16:24-28; Luke 9:23-27)*

34 Ma Iesu, patara ma ana tauvotaḡotaḡo i raukwatuei ma i riwei, “Mepa da aiai ita votaḡotaḡoiu. Tauna ina boviana-melei ma ana korosi ina avarai ma ina votaḡotaḡoiu.[†]

35 Aiai ana lawana e tatajijini, ina vine-boai. Ma aiai da ana lawana i verenei; Tau ma Riwana Aiaina aubaina. Tauna ana lawana ina vaimelei.

36 Ana aii bo anona aiwai, mepa da wei dobuna lawanana ma vigulauna ma vaipai ma am lawana maemae-nonoana ma vine-boai.

37 Wate aiwaiei am lawana ma gimara-melei.

38 Mepa da aiai: tau ma au viararamana ina vinimalei; ma i mae-puputeu; ma ana ḡoanei kaua apoapoe ina kaukauei. Rava Natuna, tauna

[†] **8:34:** Wei lamna awanaina. Anona lamna Iesu ana tauvotaḡotaḡo anina vinimala ma apoapoei ina nelāḡai aubaina taui, tauna i votaḡotaḡoi. Tauna eḡa ita ririwa da ana tauvotaḡotaḡo au korosi ina iraḡe me tauna.

ina vinimalei maranaina ina nememei; Amana ana au boruma anela vivivirei maiteni.”

9

¹ Ma Iesu, wenanare i riwei, “Taumi a ririwana-kauemi; rava ġelaumi weka o maimairi amapo eġa ona iraġe da God ana vigulau ona inanai ana rewapanana ina nei.”

*Iesu inanana i virai
(Matthew 17:1-13; Luke 9:28-36)*

² Au pom six muriai, Iesu, Peter, James ma John i taravaini. Ma taui ava i ġae ola ġaēgaena au tepana. Ma kampa taui au matai, Iesu inanana i virai.

³ Ana gara i arapoira ma gamrina i vimata-kamokamota; eġa me aiwai ġelauna au dobu nanare.

⁴ Ma kampa au matai, Elijah ma Moses i eġa. Ma Iesu maiteni i bababani.

⁵ Ma Peter Iesu i riwei, “Tauviararamana, i aii da tauta weka. Ma vianinelai da numakweta tonuġa ana voai: tagogi tam aubaim, ġelauna Moses ma ġelauna Elijah aubaina!”

⁶ Ma taui i rovo kaua ma Peter eġa ita aramanei da aiwai i latolatoni.

⁷ [✳]Anina ma apau i eġa ma taui i purui. Ma pona apauei i opu ma i riwa i pa, “Wei Tau Natu au nuavainana, ona rautaniġanei!”

⁸ Maratagogi taui i ’nana viravira ma eġa aiai ġelauna ita inanai ma Iesu, tauna ava.

⁹ Ma maranai olei i ġaiġairai ma Iesu, taui i viġaei da aiwai i ’nananaia eġa ina vieġai da au naona Rava Natuna iraġelei ina vomairi me.

[✳] **9:7:** Mrk 1:11

10 Ma taui, wei riwana i voteletelei ma i babani vivira i pa, “Iraägelei vomairi me anona aiwai?”

11 Ma taui, i vitara-virevirei i pa, “Aiwai aubaina, tarawatu babadai e ririwa da Elijah au naona ina nei?”*

12 Iesu i paribelei, “Riwa kaua Elijah au naona ina nei da aiwai anatapuna ina vokaukauei. Aubaina wariağā i girumi da Rava Natuna ina vinuapoapoe kaua ma ina inana-geduaiei.

13 Wate a ririwana-kauemi da Elijah anina i nei ma rava, ai ǵoanei tauna i rau-iviaapoapoelei me i girugirumia nanare.”†

Iesu, arua-apoapoena tevera orotona awarina i viopuni

(Matthew 17:14-21; Luke 9:37-43a)

14 Iesu ana tauvotaǵotaǵo tonuǵa maiteni olei i ǵaira memei ai rava awari ma patara ǵaeǵaena, taui i gariǵuruvi. Ma Jew ai tarawatu babadai, taui maiteni i vivitarapiri.

15 Maranai patara, Iesu i 'nanai. Taui orai i auepai ma awarina i ruba ma i viegualauie.

16 Iesu, taui i vitara-virevirei, “Aiwai o vitarapiriei?”

17 Orotagogi patara au poui i paribelana, “Tauviararamana, arua-apoapoena natu orotona au orana e mamae ma i kaei da eǵa ita bababani, lamna aubaina a neiai awarim.

* **9:11:** Mai Jew i vitumaǵana da Elijah au naona ina nememei ma *Keriso* muriai ita nei. (Mal 3:1, 4:5-6). Ma taui eǵa ita notai da Elijah rau-iviaapoapoe ina nelaǵai ana au nememei. † **9:13:** Iesu lamna John Taubabataito i bababaniei da tauna Elijah (Mat 11:13-14, 17:10-13)

18 Maranai ana doria e ururu-melei, lamna arua-apoapoenā: tauna au doa e tawatawanei; gamona e vivipuropuro; ivona e utauta ġirigiriei; ma inina e badobado. Am tauvotaġoġa da vibaġai da arua-apoapoenā ita viopuni, wate eġa tagotagogina da ita kauei.”

19 Ma Iesu i paribelei, “Oo mara aiwai ona vitumaġana! Ta mae ġaġa ma ami vita ana ‘vara ġagalei? Tevera awariu ona neiai!”

20 Ma tevera i neiai Iesu awarina. Ma maranai arua-apoapoenā, Iesu i ‘nanai, maratagogi tevera i viaikwajiana-guratei da au doa i tonei ma i vitatauvira ma i vivipuropuro.

21 Iesu, tevera amana i vitara-virevirei, “Wei teverana ana doria mara aiwai i vikarei?”

I paribelei i pa, “Maranai aburunai.

22 Arua-apoapoenā mara au anatapuna, tauna ai au araratana ma au waira e tawatawanei ma i ġoei da ita viraġeni. Mepa da tam tagotagogina; ma raunu’apoapoelelai ma ma voaguial!”

23 Iesu, tauna i riwei, “Menanare da u riwa, ‘Mepa da tam tagotagogina?’ Aiai ravana e vivitumaġana, God anatapuna ina kauei tauna aubaina.”

24 Maratagogi tevera amana i garara, “A vitumaġana, wate au tumaġana eġa ita rata ma ma voaguiu da ina rata!”

25 Iesu i ‘nana da patara i rierieiai awarii ma lamna aubaina arua-apoapoenā i egari i pa, “Tam arua taniġa-potapotana ma gumgum. Tau a egaegarim da tevera ma opu-tawanei. Ma eġa melanai au orana ma rui me!”

26 Ma arua i garara ma tevera i viaikwajiana-guratei ma i opu-tawanei. Ma tevera inanana me taubeu. Ma rava maġamaġaui kampa i riwa, “Tauna i’raġe!”

²⁷ Ma Iesu, tauna urana i vojijini ma i sinaepai da i mairi.

²⁸ Muriai Iesu, ana tauvotaḡotaḡo maiteni i rui au numa. Ma maranai taui ava ma i paridadanei i pa, “Aiwai aubaina tauai eḡa tagotagogina da arua-apoapoa da viopuni?”

²⁹ Iesu, i riwa, “Arua-apoapoei me wenanare, pari ainelana ina viopuni.”

*Iesu ana iraḡe i babaniana-melei
(Matthew 17:22-23; Luke 9:43b-45)*

³⁰ Iesu, ana tauvotaḡotaḡo maiteni dobuna i netawanei ma Galili i verautuini. Iesu eḡa ita ḡoei da rava ita aramanei da taui mepa.

³¹ Aubaina tauna, ana tauvotaḡotaḡo i viararamani i pa, “Taui Rava Natuna ina amverenei rava ḡelaui au urai. Ma taui ina viraḡeni. Wate au pom tonuḡa au murina ina vomairi me.”

³² Wate taui eḡa ita aramanei tauna aiwai i bababaniei. Ma pari-dadanana i rovoei.

*Tauvotaḡotaḡo i vitarapiri vivira da aiai i ḡetelara
(Matthew 18:1-5; Luke 9:46-48)*

³³ Iesu ana tauvotaḡotaḡo maiteni i ḡeta au Capeniam ma au numa i rui. Ma Iesu, taui i vitara-virevirei, “Au etanai aiwai o vitarapiriei?”

³⁴ Wate taui i genuana, aubaina au etanai taui i vitarapiri vivira da aiai i ḡetelara.

³⁵ [✧]Iesu i kiala ma Apasol 12 i raukwatuei awarina ma i riwei i pa, “Aiai e ḡoeḡoe da ina vibada. Tauna ina tereḡairana-melei ma ina vimuri dewadewa ma ina vitaunola rava aubai.”

36 Ma Iesu, tevera i vaia ma au poui i vimairini. Ma urana au jiġona i tere-taġonei. Ma taui i riwei i pa,

37 “Aiai ravana; tau wavauei, tevera wenanare i rauġorei. Lamna tau maiteni e raraugoreiu. Ma aiai da tau e raraugoreiu. Lamna tauparitawaneu maiteni e raraugorei.”

*Aiai eġa ata ġavia, lamna turata
(Luke 9:49-50)*

38 Anina ma John, Iesu i riwei, “Tauviararamana! Tauai, oroto tagogi a inanai; tam wavamei arua-apoapoena i viviopuni ma tauna eġa turata. Lamna aubaina a viġaei da eġa ina kauana-melei.”

39 Iesu i riwa, “Eġa ona viġaei! Eġa aiai au wavau kaua babai ina kauei ma muriae ina parivai-apoapoenu.

40 Aiai ravana eġa ata ġavia; lamna turata.

41 Tau a ririwana-kauemi. Mepa da aiai ravana, waira i veremi tau au wavau; aubaina taumi au Tauvotaġotaġo. Taui ai maia eġa ina vine-boai.”

*Raelara babanina
(Matthew 18:6-9; Luke 17:1-2)*

42 Aiai ravana i kauei da wei teverana ana tu-maġana Tau awariu i viapoapoeni da ġo'apoapoe i kauei. Lamna i ai da ġaima ġaeġaena ravana au uatabana ina duri ma au boga ina tawanei aubaina God, tauna ina kovoġa-guratei. **43-44** Mepa da nimam i kauem da ġo'apoapoe u kauei. Ma boritawanei! I aii da nimam tagogiava ma lawana mamae-nonoana ma vaia. Ma eġa ma kauei da nimam ruāġa aiaii ma ma nae ai au menamenana; mepa ai eġa melanai ita bobo.‡

‡ **9:43-44:** Wariaġa nimaiei i giruma damanei taui riwana tagogina me vs 48.

45-46 Mepa da aem i kauem da ġo'apoapoena u kauei. Ma bori-tawanei! I aii da sigesigem au lawana mamae-nonoana ma rui. Eġa me aem ruaġa aiai ma ai au menamenana ina tawanem. §

47 Ma mepa da matam ina kauem da ġo'apoapoena u kauei. Ma vaitawanei! I aii da matam tagogi ma God ana vigulau ma rui. Eġa me matam ruaġa ma ai au menamenana ina tawanem;

48 dobuna motamotana eġa ita irairāġe ma ai eġa ita bobo.

49 Au Tauvotaġo anataputapui, ai araratanei ina bogai.

50 “Nia i ai lam viaiainana aubaina. Ma mepa da i tomatoma, mena ma vidagianei. Nia au orami ina mae ma ona viturana vivira!”

10

Iesu, tavine vilamonana i babaniei

1 Ma Iesu, dobuna i netawanei ma i nae Judea ana paratana. Ma Waira Jordan i damani da au baba ġelauna. Patara ġaegħaena i riana-melei. Ma Iesu i viararamana, me mara patapatana i kaukauei nanare.

2 Ma Pharisi ġelaui i ġoei da tauna ita waroi. Ma lamna aubaina i vitara-virevirei, “Tarawatu e mamae bo eġa da rava, awana maiteni ita vilamonei?”

3 Ma Iesu i paribelei, “Moses ana Tarawatu aiwai e ririwei?”

§ **9:45-46:** Wariāġa nimalei i giruma damanei taui riwana tagogina me vs 48.

⁴ Ma taui i riwa, “Moses ana Tarawatu e ririwa da oroto *vilamona pepana ina girumi ma awana ina verei. Ma taui ina vilamonei.*”

⁵ Iesu i paribelei, “Taumi orami i bada. Au baina Moses wei Tarawatuna i terei.

⁶ [◊]Wate ona notai da au karena, maranai God rava i kauei *ma tauna oroto ma wavine i kauei.*

⁷ [◊]*Ma lamna aubaina oroto amana ma alona ina netawanei*

⁸ *ma awana maiteni ina vitagogi* da taui ega ruaga me au naona ma tupua tagogi.

⁹ God aiwai i vitagogie, ega aiai ina vilamonei.”

¹⁰ Maranai taui i naeme au numa, ma tauvotaago, Iesu i vitara-virevirei wei kauai aubaii.

¹¹ Iesu i paribelei, “Mepa da oroto, awana i voterei. Ma wavine gelauna i ravaagi. Lamna tauna, awana awarina i rauviapoapoe.”

¹² Ma nanarena mepa da wavine, awana i voterei ma oroto gelauna i ravaagi. Lamna awana, awarina i rauviapoapoe.”

Iesu, roaroa i viaiaini

¹³ Rava gelaui, roaroa i neiai Iesu awarina da urana au tepai ita terei. Ma ana tauvotaago, ravai i viigaei.

¹⁴ Maranai Iesu wei kauai i 'nanai. Ma ana tauvotaago i eni ma i riwa, “Roaroa ona voterei da awariu ina nei. Ma ega ona viigaei. Au baina God ana vigulau, lamna rava wenanare aubai me wei roaroai.

¹⁵ A ririwana-kauemi. Aiai, God ana vigulau ega ina vaia me tevera aburuna nanare. Tauna, ega God ana au vigulau ina rui.”

[◊] **10:6:** Gen 1:27 [◊] **10:7:** Gen 2:24

16 Ma roaroa i taravaini ma i rapai, urana au tepai i terei, i raupari ma i viaiaini.

Purapura ravana

(Matthew 19:16-30; Luke 18:18-30)

17 Ma maranai Iesu i vomairi da i nenaē. Oroto i ruba ġeta ma au naona i raudune ma i riwa i pa, “Taugiu vinualaulaunam. Aiwai ana kauei da lawana maemae-nonoana ana vibuderiei?”

18 Ma Iesu i paribelei i pa, “Aiwai aubaina, tau u vikaua vinualaulauneu? God, tauna ava vinualaulaunana.

19 [✧]Tam, God ana Tarawatu u aramanei, *Eġa ma viraġena!* *Eġa ma awadanene!* *Eġa ma danene!* *Eġa ma viwavu-moru!* *Eġa ma amkwalakwala!* *Amam ma Alom ma vivirei!*”

20 Ma tauna i riwei, “Taugiu! Maranai tau aburueu da amadodo, wei tarawatui anatapui a voteletelei.”

21 Iesu, tauna i 'nanai ma i vinuavainei ma i riwei, “Kaua tagogi e mamae eġa uta kaukauei. Ma nae ma am purapura anatapuna ma gimarei. Ma manena, rava molamolakai ma verei. Ma au mara God, tam ina vimaiem. Ma ma nei ma ma votaġotaġoiu!”

22 Ma maranai oroto wei riwana i nonori. Naona i peu ma ana nuabolana i nae; aubaina tauna, purapura ravana.

23 Iesu i 'nana viravira ma ana tauvotaġotaġo awari i riwa, “I piripiri kaua da purapura ravana, God ana au vigulau ina rui.”

24 Tauvotaġotaġo riwana i baiei maranai Iesu wenanare i babani. Ma Iesu i riwa me, “Natunatu!

[✧] **10:19:** Exo 20:13; Exo 20:14; Exo 20:15; Exo 20:16; Exo 20:12

I piripiri kaua da purapura ravana,* God ana au vigulau ina rui.

²⁵ I telatela kaua da ġamoġamo ġaeġaena wavana kamel, iġoma au gavogavona ina rui. Ma i piripiri guratana da purapura ravana, ana lawana God ina verei. Ma God, tauna ina vibadei.”

²⁶ Taui i vinuanaina ma ai nota i kwa. Ma taui ava i babani vivira i pa, “Mepa da nanare; amapo aiai lawana mamae-nonoana ina vaia?”[†]

²⁷ Iesu awarii i ’nana ma i riwei, “Rava awarii wei kauai i piripiri. Wate eġa God awarina. God awarina aiwai anatapuna i telatela kaua.”

²⁸ Ma Peter i riwei, “Ma tauai menanare? Tauai ai purapura a voterei ma tam a votaġoim.”[‡]

²⁹ Iesu i paribelana, “A ririwana-kauemi. Aiai da ana numa bo varevareina bo novunovuna bo alona bo amana bo natunatuna bo ana wapu ina voterei ma tau ina votaġotaġoiu; tau ma Riwana Aiaina aubaina.

³⁰ Tauna ana maia ina rata kaua wei au dobuna. Tauna ana maia ina viaitepatepani da ana numa, varevareina, novunovuna, alona, natunatuna ma ana wapu, anatapui ina maġa. Rava ina rauviapoapoelem; aubaina tam, tau au Tauvotaġotaġo da mara au murina tauna lawana mamae-nonoana ina vaia.

³¹ Wate maġamaġaui marina e vivinao; taui ina vimuri. Ma maġamaġaui da e vivimuri; ina vinao.”

* **10:24:** Wei riwana buka ġelaui awarii e mamae ma ġelaui eġa *pura-pura ravana*. † **10:26:** Mai Jew i notai da rava vipurapurai lamna BADA ana verena ana nuavaina matairana, taui e notai da BADA, rava vipurapurai eġa ina gagaloei, tauna ravai ġelaui maiteni eġa ina gagaloei. ‡ **10:28:** Peter i ġoei da ita aramanei da tauvotaġotaġo ai au iraġe maiana aiwai, ina vaia.

*Iesu ana iraäge babanina i vitonui
(Matthew 20:17-19; Luke 18:31-33)*

³² Iesu, ana tauvotağotaño maiteni i ġeġae au Jerusalem. Iesu, taui au naoi i nenea. Tauvotağotaño i baiei. Ma rava ġelaui au muri i nenei i rovo kaua. § Ma taui 12 i rauğorei au ririva ma i raukarei da kaua amapo da awarina ina tupua; taui i vieğei

³³ I pa, “Ona inana, tauta ta ġeġae au Jerusalem. Ma Rava Natuna ina verenei pirisi babadai; ma tarawatu babadai awarii. Ma taui ana iraäge ina vianinei. Ma Mai Jentail ina verei.

³⁴ Ma tauna ina vijibogi ma ina ovai ma ina kwapui ma ina virağeni. Au pom vitonuina ina vomairi me.”

*James ma John ai vibağa
(Matthew 20:20-28)*

³⁵ - Zebedi natunatuna James ma John i nei Iesu awarina ma i vibağai i pa, “Tauviararamana! Tauai ai ġoana a vivibağei uta kauei.”

³⁶ Iesu i riwa i pa, “Aiwai o ġoeğoei ana kauei aubaimi?”

³⁷ Taui i paribelana, “Ma verelai da ana kiala, tagogi au oiem ma ġelauna au kelakelaum am au vigulau.”

³⁸ Iesu i paribelei, “Taumi eğä ota aramanei aiwai o vivibağei! Iniviara kelakana ana umai. Taumi

§ **10:32:** *Iesu i ġeġae au Jerusalem ma rava mağamağau i viġavie i lamna aubaina ana tauvotağotaño i baiei da tauna tepana i tora da weka i nenea. Rava ġelaui i votağotaño, taui i rovo kaua da aiwai awarina ina tupua maranai i ġeta au Jerusalem.*

tagotagogina da ona umai bo? Tagotagogina ona babataito me tau ina babataitoiu?*”

³⁹ I paribelei, “Tauai tagotagogina!”

Iesu i riwei, “Iniviara kelakana anina ona umai ma ona irāge me tau ana irāge.

⁴⁰ Wate tau au rewapana eōga ita mamae da ana veremi da mepa ona kiala au oieu bo au kelake-lau. God, rava i vinevinei; taui ai gabu i vokaukauei.”

⁴¹ Maranai Tauvotaōgatāgo 10 ġelaui, wei riwana i nonori. Taui James ma John awarii i ġaiawa.

⁴² Ma Iesu, taui anatapui i ġorei da awarina ma i riwei, “O aramanei da jentail ai babada, dobu ġela ravai jentail awarii e mamae-ġaeġae ma e raraaviapoapoelei. Wate taui ai babada ġaeġaei, ai rewapana i ġetelera da ai rava e vibadebadei da ai ġoana e kaukauei.

⁴³ [☆]Wate au tauvotaōgatāgo eōga nanare. Eōga da aiai i ġoei da ina ġetelara taumi au poumi; tauna anina da ina vitaunola.

⁴⁴ Aiai i ġoei da ita vinao. Tauna ina vitaunola rava anatapui aubai.

⁴⁵ Ma nanare Rava Natuna eōga ita nei da tauna, tana nolei. Wate ita vitaunola rava aubaii. Ma ana lawana ita verenei da rava maġamaġaui ai lawana ita gimara-melei.”[†]

*Iesu, rava mata-potapotana Batimeus i vilawani
(Luke 18:35-43)*

* **10:38:** ...babataito me tau ina babataitoiu taui iniviara ma irāge e bababaniei, maranai Iesu au Gethsemani i raraupari muriai da ana irāge tauna ana nuabolana kelaka i babaniei (Mrk 14:36). Iesu, James ma John i riwei da nuabola ina nelaġai. [☆] **10:43:** Mrk 9:35

[†] **10:45:** Iesu i vinuapoapoe ma irāge aubaita me Isaiah i girugirumia nanare au Isa 52:13-53:12.

46 Ma taui i ġeta au Jeriko. Iesu, ana tauvotaġoġo, patara ġaeġaena maiteni dobuna i opuopu-tawanei. Ma oroto mata-potapotana, wavana Batimeias, Timaeus natuna au etanai i kiakiala ma i viamgigimana.

47 Maranai i nonori da tauna, Iesu Nasaretei; garara i raukarei i pa, “Iesu, tam David natuna! Ma raunu’apoapoeleu!”‡

48 Rava maġamaġaui, tauna i rai ma i riwei da ita genuana. Wate tauna, garara i voguratei, “David Natuna! Ma raunu’apoapoeleu!”

49 Iesu i tumairi ma i pa, “Ona ġoreiai!”

Anina taui, mata-potapotana i ġoreiai i pa, “Tepam ina tora ma ma vomairi! E ġoreġorem!”

50 Tauna, ana puru i tawanei ma i vomairi laġilaġina ma i nei Iesu awarina.

51 Iesu i paridadana i pa, “Aiwai u ġoei ana kauei aubaim?”

Mata-potapotana i paribelei, “Tauviararamana! A ġoei da ana inana me.”

52 Iesu i riwa, “Ma nae! Am tumaġana i vilawanim.” Maratagogi tauna i ’nana me ma Iesu au eta i votaġoġoi.

11

Iesu i rui au Jerusalem

(Matthew 21:1-11; Luke 19:28-40; John 12:12-19)

‡ **10:47:** Maranai oroto mata-potapotana Iesu i kwatuei *David natuna* ma mai Jew i aramanei *Keriso - BADA ana vinevine* i babaniei. Mai Jew i aramanei da *Keriso* ai wavalatona me David wariaġa nanare. Ma i nei da rava doridoriai ita vilawani me. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24)

¹ Ma maranai Jerusalem i tuğereğerei ma i rui au Betphagi ma Bethani* au ola *Olives*. Ma ana tauvotağotağō ruāga i paritawanei,

² ma i riwei i pa, “Ona nae au melagai au naomi. Maranai o ruirui, kampa *donki* natuna ġaubo, raġiraġitana ona nelaġai. Tauna eġa aiai ita gerudadanei. Ona rupeni ma ona neiai.[†]

³ Mepa da aiai ina paridadana, ‘Aiwai aubaina wei o kaukauei?’ Ona riwei, ‘BADA e ġoegħoei ma maratagogi ina paritawana-melei.’

⁴ Ma i nae ma *donki* ġaubona au doa au metaeta raġiraġitana i rupeni.

⁵ Rava ġelaui kampa i maimairi i paridadana i pa, “Aiwai o kaukauei *donki* ġaubona o ruperupeni?”

⁶ Ma i paribelei me Iesu i ririweia nanare ma taui i voterei da i nae.

⁷ Taui *donki* i neiai Iesu awarina ma ai puru au uporana i tawana-epai ma au tepana Iesu i kiala.

⁸ Ma rava maġamaġaui, ai puru au eta i ebani ma ġelaui, ai rugurugu i tarataraia i ebani.

⁹ Taui i vivinao ma taui au muri i nenei i garara: “Hosanna!”‡

“Viviaiainana tauna BADA au wavana e nenei!”

¹⁰ “Viviaiainana amata David ana vigulau e nenei!”

“*Hosanna* au aidamo telarana!”

* **11:1:** Eng. *Bethphage & Bethani*. † **11:2:** Mai Jew awari, *donki lamna nola aubaina ma eġa gulau ana anigeru. Donki i gerui lamna e rirweta da tauna gulau ana nuaubana ma vilamolamonana i nei.*

‡ **11:9:** Lamna pona Aram anona *ma vilawaniai* ma muriae lamna viegualau ma vimae-ġaġaena aubaina.

¹¹ Iesu i ġeta au Jerusalem ma i rui au Tempol ma anatapuna i tuvirevirei ma au i biga aubaina, i opu me au Bethani, taui 12 maiteni.

*Iesu, damala aina i parivai-irairaġeni
(Matthew 21:18-19)*

¹² Ma marana i tom, taui Bethani i opu-tawanei ma Iesu am-iraġe.

¹³ Au weia ma damala aina i 'nanai ana ruguruguna. Ma i nae da ita inanai da i ua bo eġa. Maranai kampa i ġeta, eġa aiwai ita nelaġai. Anina ai ruguruguna ava, aubaina eġa damala ana mara.

¹⁴ Iesu, damala aina i riwei i pa, "Eġa aiai amadodo ma amapo anom ina am-melei!" Ma ana tauvotaġotaġo i nonori aiwai i latoni.

*Iesu, taugimara tempolei i viāgaġana-opunei
(Matthew 21:12-17; Luke 19:45-48; John 2:13-22)*

¹⁵ Maranai taui i ġeta au Jerusalem, Iesu i rui Tempol garina au orana ma taugimara i viāgaġana-opunei, mane tauviraina§ ai kepakepa ma gabubu taugimareina ai anikiala i vitauvirai.

¹⁶ Ma i viġaei da eġa aiai ana gimara Tempol au orana ita avarai-naiei.

¹⁷ *Ma rava i viararamani i pa, "I girugirumia nanare,

'Au numa ina ġorei pari numana
dam anatapui au dobu aubai.'

§ **11:15:** Mai Jew ai au nota da mai Rome ma mai Greek aruai mane au tepana i terei, wei mai Jew awari lamna god morumoruna. Mane tauviraina au Tempol mane dobu ġelaui i virai da Tempol mane wei lamna Jew tarawatu i vianinei gimara au Tempol aubaina (Exo 30.13). * **11:17:** Isa 56:7

Wate taumi o vovirai da kwalakwalai ai guba.”*

¹⁸ Pirisi Babadai ma tarawatu Babadai i nonori ma i ogei da ita viraġeni. Taui, Iesu i rovoe i aubaina patara ana viararamana i baiei.

¹⁹ Ma au bigai Iesu ana rava, Jerusalem i opu-tawanei.

*Damala aina i poi
(Matthew 21:20-22)*

²⁰ Ma ubaubanai taui i nena ma damala aina i 'nanai anatapuna i poi.

²¹ Peter i notai ma i riwa “Tauviararamana ma inana! Damala aina u parivai-irairaġenia i poi.”

²² Iesu i paribelei, “God ona vitumaġanei!

²³ A ririwana-kauemi. Rava wei olana ita riwei, ‘Ma vomairi ma au boga ma tawanem!’ Ma nuantuana eġa ina raġaraġa ma ina vitumaġana da aiwai e ririweia, ina tupua.

²⁴ Lamna aubaina a ririwemi. Aiwai ami au pari o vibaġei, ona vitumaġana da taumi boibogħi o vaia ma ina viġarimie.

²⁵ Ma maranai e raraupari, au naona rava anatapui ai ġo'apoapoe awarim ma nota-tawanei. Ma nanare amam au mara am ġo'apoapoe ina nota-tawanei.”†

*Jew babadai, Iesu ana vibadana i vitarapiriei
(Matthew 21:23-27; Luke 20:1-8)*

* **11:17:** Iesu dobuġela manena tauviraina ma gimara ravai i viwavui da taui pari numana i vovirai da amkwalakwalai ai guba, taui rava ai arua nolana e viviapoapoeni Jer 7:11-15. † **11:25:** Riwa wadubo nonoana uraiei i girugirumia vs 26 weka eġa ita mamae, *Mepa da rava ai apoapoei eġa ma nota-tawanei, amam au mara nanare am apoapoei eġa ina nota-tawanei.*

²⁷ Taui i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina.

²⁸ Ma i paridadanei i pa, “Aiwai vibadanei wei kauai e kaukauei? Aiai vibadana i verem da wei kauai uta kuae?”

²⁹ Iesu i paribelei i pa, “Au vitaraviravira tagogi ana terei ma ona paribeieu. Ma ana riwemi; aiwai vibadanei wei kauai a kaukauei.

³⁰ Aiai, John taubabataito vibadana i verei da rava ita babataittoi, God bo rava? Ona riweu!”

³¹ Taui i vitarapiri vivira, “Mepa da tana riwa, ‘Godei.’ Tauna ina riwa, ‘Ma aiwai aubaina ega ota vitumaġanei?’

³² Wate ega tana riwa da, ‘Ravei.’ Taui rava i rovoei, aubaina rava anatapui, ai nota da John anina peroveta.

³³ Ma i paribelei, “Tauai ega ata aramanei.” Iesu i riwa, “Tau nanare ega ana riwemi aiwai vibadanei wei kauai a kaukauei.”

12

Tauipi ai awanaina

(Matthew 21:33-46; Luke 20:9-19)

¹ *Iesu i vikarei ma awanainei awari i babani i pa, “Mara tagogi oroto, ana wapu i kuae ma grape i paewi* ma i gari ma grape anigudana ma violaġa numana i voai. Ma tauipi ġelau i verei da ita nolei taui anatapui aubai. Ma i vaġai au dobu ġela.

* **12:1:** Isa 5:1-2 * **12:1:** Parivainota wadubona, God au anatapuna Israel e bababaniei me tauna ana grape wapuna, me Isa 5:1-2.

² Tuaruta ana mara i ġetai ma taniwaga, ana taunola i paritawanei tauipi awarii da ana ġuta ita vaia.

³ Wate tauipi, tauna i vojjini ma i kwapui ma kwakwavina i paritawanei.

⁴ Ma taniwaga, taunola ġelauna i paritawanei. Ma taui, kolana i viaibauni ma i vitepaubaubai.

⁵ Ma taunola ġelauna i paritawanei ma tauna i viraġeni ma i maġa ġelaui i paritawanei, ġelaui i kwapui ma ġelaui i viraġeni.

⁶ Ma tagogi ava e mamae da ina paritawanei. Lamna natuna orotona tagotago ana nuavainana. Ma tauna au murioina i paritawanei ma i pa, ‘Taui, natu ina vivirei.’

⁷ Wate taui, tauna i ’nanai ma i riwa vivira i pa, ‘Wei taniwaga natuna. Ona nei, tana viraġeni ma ana buderi ina viġaritaiei!’

⁸ Ma i vunui ma i viraġeni ma tupuana wapuei i tawanana-opunei.

⁹ —Wapu taniwagana marina aiwai ina kaei taui awarii? Tauna ina nei ma tauipi ina viraġeni ma grape wapuna ina veredamanei tauipi ġelaui awari.

¹⁰ Wei girumana o iavi bo eġa?

‘Wei ġaimana, tauvoa i geduaiei,
wate muriai i nelāgai da tauna ġaima kaua.

¹¹ Wei lamna, BADA ana kaua
ma inanana i vinualaulauna.” (*Psalm 118:22-23*)

¹² Jew babadai i aramanei da awanaina lamna taui i bababaniei ma i ġoei da ita pani. Wate taui patara i rovoei, lamna aubaina Iesu i voterei ma i nae.

Mark 12:13

liv

Mark 12:18

Caesar awarina tax tana terei bo eēga?

(Matthew 22:15-22; Luke 20:20-26)

¹³ Ma Pharisi ġelaui ma Herod ana rava ġelaui i nae Iesu awarina da riwei ita waroi.

¹⁴ Taui i nei ma i riwa, “Tauviararamana, tauai aramanei da tam rava jijimanim. Ma rava wavai naenaei ma rava labalababa eēga uta vibainaenaei ma anatapui e vaivaia da tagogi. Wate tam God ana babani riwa kaeui e viararamani. Ma riwelai tax tana terei Rome gulauna wavana Caesar[†] awarina, i aii bo eēga?”

¹⁵ Wate Iesu, ai moru i 'nana-bauni ma i riwei, “Aiwai aubaina o raudadaniu? Mani tagogi ona neiae da ana inanai!”

¹⁶ Denarius tagogi i neiae Iesu awarina ma taui i vitara-virevirei, “Wei aiai aruana ma wavana?” I paribelei, “Caesar.”

¹⁷ Iesu i riwa, “Aiwai Caesar ġarinei, Caesar ona verei. Ma aiwai God ġarinei, God ona verei!” Ma taui i baiei.

Sadusi ġelaui, Iesu i vitara-virevirei irairaġelei vommairina aubaina

(Matthew 22:23-33; Luke 20:27-40)

¹⁸ \diamond Mai Sadusi ai vitumaġana da rava eēga ita vovomairi-me maranai e irairaġe.[‡] Anina ma ġelaui i nei Iesu awarina ma i paridadanei,

[†] **12:14:** Sisa. [◊] **12:18:** Act 23:8 [‡] **12:18:** Sadusi taui gulagulau ma rava ġaġġaei mai Jew ai giu babadai taui maiteni eēga ita vitumaġana da *anel* bo arua ġelaui e mamae ma buka 5 i vinao, Moses i girugrumia, taui lamna ava e vivitumaġanei (Karena, Exodus, Leviticus, Numbers, Deuteronomy). Ma eēga buka ġelaui. Wate Moses ma BADA riwaiei taui i viatataiei da lawana e mamae iraġe au murina.

19 “Tauviararamana! God ana tarawatu, Moses wenanare i girumi: Mepa da oroto i’rağe ma kaiababana i netawanei ma eğä natunatui. OROTO vareina kaiababana ina ravağī ma roaroa ina ġuni vareina aubaina.

20 Mara tagogi varevarei seven i mae. Ma natuevou i tavine ma eğä natunatuna ma oroto i’rağe.

21 Vareina viruaina kaiababa i ravağī ma tauna maiteni eğä natuna ma i’rağe. Ma nanare vareina vitonuina.

22 Ma nanare anatapui seven, wavinena i ravağī ma eğä natunatui. Au muriai wavine i’rağe.

23 Anatapui seven, wavinena i ravağī. Vomairi me au marana, lamna aiai awana?”

24 Iesu, taui i riwei, “*Aiwai Moses* i girumi ma God ana rewapanā eğä ota aramanei.

25 Maranai taui irağelei ina vomairi, taui eğä ina tavine bo ina vitavinei. Wate ina mae me anela au mara.

26 [❖]Ma rava irağelei ai vomairi babanina, Moses ana tarawatu eğä ota iavi bo? Mepa aii ararata lana, kampa God Moses i riwei: *Tau Abraham ana God ma Isaac ana God ma Jacob ana God.*

27 Tauna eğä rava irairağei ai God, wate rava lawalawai ai God. Taumi o moru kaua!§”

Tarawatu ġeġetelarana

(Matthew 22:34-40; Luke 10:25-28)

28 Ma tarawatu badana tagogi i nae ma ai vitarapiri i nonori. Ma i nonori da Iesu i babani kaua,

[❖] **12:26:** Exo 3:6 § **12:27:** ...wate rava lawalawai ai God. Mepa da BADA i riwa da tauna Abraham ma Isaac ma Jacob ai God, taui lawalawai maranai BADA, Moses awarina i babani.

lamna aubaina tauna i vitara-viravira, “God ana tarawatu metauna i ġetelara?”

29 ✽Iesu i paribelei, “GeVgetelarana tagogi lamna wei: *Ona rautaniġana Israel!* BADA *ata God, tauna ava* BADA.

30 BADA *ami God nuanuami ina vaia orami anatapunei ma aruami anatapunei ma ami nota anatapunei ma ami rewapanan anatapunei!*

31 ✽Ma viruaina lamna wei: *Rava ġelaui nuanuam ina vaia me tam nuanuam e vaivai-melei!* Wei tarawatui ruāga i ġetelara, eġa me ġelaui nanare.”

32 Tarawatu badana i riwa, “Tauviararamana u babani kaua! Riwa kaua u babaniei, BADA *Tauna ava God ma eġa mepa ġelauna.*

33 Ma *nuanuami ina vaia orami anatapunei ma ami nota anatapunei ma ami rewapanan anatapunei.* Ma, *Rava turam nuanuam ina vaia me tam nuanuam e vaivai-melei.* Wei tarawatui ruāga lamna i ġetelera, eġa me pulo apuapunana bo pulo ġelaui.”

34 Iesu i ’nanai da tauna i paribelana kaua ma i riwei, “Tam, God ana vigulau au ġereġerena e ġeġeta.” Ma eġa aiai tepana ita tora da Iesu ita vitara-viravirana-melei.

Keriso tauna aiai?

(Matthew 22:41-46; Luke 20:41-44)

35 Maranai Iesu au Tempol i viararamana ma i vitara-viravira i pa, “Aiwai aubaina Tarawatu Babadai e ririwa da Keriso tauna David natuna?

36 ✽ Arua Vivivireina, David nota i verei ma tauna i riwa:

‘MAMAE-NONOANA *au gulau i riwei,*
Au oieu ma kiala

✽ **12:29:** Deu 6:4-5 ✽ **12:31:** Lev 19:18 ✽ **12:36:** Psa 110:1

*da am ġavia
au ae karem da ma tuvaidoedoei.’ (Psalm
110:1)*

³⁷ —David, tauoina wei gulauna i ġorei *bada*. Ma menanare da badana lamna, David natuna?” Patara ġaeġaena riwana i nonori ma i vinuaiai.

*Iesu, Tarawatu Babadai ai kaua i babaniei
(Matthew 23:1-36; Luke 20:45-47)*

³⁸ Ma Iesu, taui i viararamani i pa, “Tarawatu babadai ona rovoei. Ai gara manamanai ma e bababara nae au deba da rava taui e vivivirei.

³⁹ Taui anikiala vinevinei pari au numana ma au torela, gabu aiaii e vaivaia.

⁴⁰ Taui, kaikaiababa e morumorui ma ai numa e kwalekwalei, e morumorou ma e raraupari-vai-manamanawa. Taui ai kovoġa ina apoapoe guratana.”

*Kaiababa ana pulo
(Luke 21:1-4)*

⁴¹ Ma Iesu, pulo aniterenana au baba ġelauna i kiala ma rava i 'nananai mane i tereterei. Rava maġamaġaui vivimanei, mane maġamaġaui i terei.

⁴² Wate kaiababa molamolakana i nei ma mane muomuoi ruaġa i terei, ruvana i aburu kaua.

⁴³ Ana tauvotaġotaġo i ġorei ma i riwei, “Anina a ririwemi, wei kaiababa molamolakana i tereguratei, eġa me taui ġelaui.

⁴⁴ Taui ġelaui ai maurei i verena, wate wei kaiababa molaka ma ġarinei anatapuna i terei, ana anilawana anatapuna.”

13

*Iesu i riwa da rava God ana Tempol ina rikai
(Matthew 24:1-2; Luke 21:5-6)*

¹ Iesu, Tempol i nene-tawanei ma ana tauvotaōtaōgo tagogi i riwa, “Tauviararamana! Numa i viġulau ġaġa ma numā ġaimai i rata ġaġa.”

² Iesu i paribelei, “Wei numai ġaeġaei u inanai, eġa ġaimai tagogi, turana au tepana ina mae. Ĝaima anatapui ina rikai.”

*Rava ina vinuapoapoe kaua. Iesu ana
tauvotaōtaōgo ina vipatutu
(Matthew 24:3-14; Luke 21:7-19)*

³ Iesu i kiakiala au ola Olives, Tempol au navanavaġela ma Peter, James, John ma Andrew i nei ma i vitaraviravirana govaġei

⁴ i pa, “Ma riwelai mara aiwai wei kauai ina tupua? Ma aiwai ina vimataira da wei kauai anatapui ina tupua?”

⁵ Iesu, taui i riwei, “Ona inana kaua da eġa aiai ina terevaideġaimi!

⁶ Rava maġamaġaui, wavauei ina nei ma ina riwa, ‘Tau Keriso tauvilawana!’ Ma rava maġamaġaui ina terevaideġai.

⁷ Ma maranai viġavia ona nonori ma viġavia aueia riwana ona nonori; eġa ona rovo! Wei kauai anina da ina tupua, wate wei eġa damona.

⁸ Dam, damai ina viġavia vivira ma dobu, dobua ina viġavia vivira. Ma lolo ma gomara dobu au anatapuna. Wei kauai, lamna me wavine ana iniviara e vivikarei maranai e vivinatuna.

⁹ —Ona inana kaua! Taumi ina panimi ma ina etaremi ma pari numana au orana

ina kwapuimi. Ma gavena ma gugulau au naoi ona mairi, aubaina taumi o votaḡotaḡoiu. Ma taui awarii, Riwa Aiaina ona raugugulei.

¹⁰ Riwana Aiaina ona raugugulei rava anatapui awari ma muriai damona ina nei.

¹¹ Ma maranai i panimi ma i etaremi. Eḡa ona vinuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eḡa taumi ota babani, wate Arua Vivivireina.

¹² Rava, vareina ina verenei da ina viraḡeni. Ma ama, natunatuna ina verenei da ina viraḡeni. Ma roaroa, amamai ma aloloi ina viḡaviei da ina iraġe.

¹³ Rava anatapui ina geduaiemi tau aubaiu. Wate aiai da e maimairi-jijina da au damona, tauna ina lawana.”

*Iniviara ḡaeḡaena ana mara
(Matthew 24:15-28; Luke 21:20-24)*

¹⁴ “Maranai ‘Kaua apoapoe kaukauana’* e maimairi mepa avena ita mairi. (Buka tauiavana wei ina aramanei anona aiwai). Taui aiavoi au Judea ina ruba laḡilaḡina au ola.

¹⁵ Aiai numa au tepana eḡa ina ġaira bo ina rui au numa da aiwai ina vaia.

¹⁶ Aiai au wapu eḡa ina naeme au numa da ana gara ina vaia.

¹⁷ Ma iniviara ḡaeḡaena, waivine duaduamai ma taui da e viviḡuġu awari nai au marana!

¹⁸ God awarina ona raupari da wei kauai eḡa au bodu ina tupua.

* ^{13:14:} Eng. *Abomination of Desolation* Dan 9:27 11:31 & 12:11

19 [◊]Ma nai au marana amapo iniviara ġaeġaena. Ma maranai God dobu i kuae, iniviara ġaeġaena eġa nanare ita tupua ma amapo eġa nanare ina tupua me.

20 Wate BADA nai marana ina vitupoi. Mepa da eġa ina vitupoi, rava anatapui ina iraġe. Wate rava, tauna ana vinevine ina vilawani lamna aubaina mara ina vitupoi.

21-22 —Muriai keriso tauvilawana morumorui ma peroveta morumorui ina nei ma mataira ma kaua babai ina kuae, ma ina kauana dadanei da God ana vinevine maiteni ita terevaideġai. Lamna aubaina mepa da aiai ina riwemi, ‘Ma inanai, Tauvilawana noi!’ bo ‘Tauna noi!’ Nai babanina eġa ona vitumaġanei!

23 Ona inana kaua; anatapuna a riwana-nonoemi!”

Rava Natuna ana nei
(Matthew 24:29-31; Luke 21:25-28)

24 Iesu wenanare i riwa, “Ma iniviara ġaeġaena au murina.

*Madeġa eġa ina rarana
ma nawaravi eġa ina lalai.* (Isaiah 13:10)

25 *Ma ubona marei ina peu
ma rewapani ġelaui au aidamo ina gui.* (Isaiah 34:4)

26 [◊]—Nai maranaina, *Rava Natuna ana rewapanana ma ana borumana apauei ina nei.*

27 Ma Tauna, ana anela ina paritawanei dobu au anatapuna da rava tauna ana vinevine ina tuarui dobu au damona da dobu ġela au damona.”

Damala ana awanaina
(Matthew 24:32-35; Luke 21:29-33)

[◊] **13:19:** Da 12:1 [◊] **13:26:** Da 7:13

28 “Damala aina ana awanaina ona aramanei. Maranai ai e numonumoi, lamna ona aramanei da maura e tuturiai.

29 Ma nanare, maranai wei kauai anatapui ina tuputupua, ona aramanei da Rava Natuna i turiai; au metaeta i ġetai.

30 Anina a ririwemi da wei kauai au naona ina tupua ma muriai da rava marina lawalawaii ina iraġe.

31 Mara ma dobu ina amo. Wate riwau eġa ina amo.”

*Bada ainelana ana nei i aramanei
(Matthew 24:36-44)*

32 “Ma eġa aiai ita aramanei nai marana bo madeġa aiwai ina nei. Anela au mara eġa ita aramanei ma Natuna eġa ita aramanei. Amana, tauna ava i aramanei.

33 Ona vineneġana ma matami ina kala!† Eġa ota aramanei mara aiwai, wei kauai ina tupua.

34 Wei me rava ana numa i netawanei ma i vaġai. Ma ana taunola nununai i terei da ita vipaipai ma tagotagogi ava ai nola i verei da ita kauei. Ma tauvineneġana i riwei da ita vineneġana.

35 Ona vineneġana! Eġa ota aramanei mara aiwai, numa taniwagana e nenei; mepa da au bigai bo au nubautuva bo maratomtomai bo ubaubanai.

36 Ma eġa matamatavemi ina nelaġaimi.

37 Aiwai riwana a ririwemi, riwana tagogina rava anatapui a riwei, ona vineneġana!”

† **13:33:** Wedau *Evanelia* i girumi, *ma i raupari*, wate buka wadubo nonoana wei eġa ita mamae, Luk 21:16 kampa ona inanai da e mamae.

14

*Jew ai babada, Iesu i ogei da ita viraġeni
 (Matthew 26:1-5; Luke 22:1-2; John 11:45-53)*

¹ [❖]Au pom ruāga muriai da Raġona ma Palawa Bagibagina torelai,* Pirisi babadai ma Tarawatu Babadai eta i baibaiei da menanare govagovaġanei Iesu ita vunui.

² Ma i riwa, “Au torela wei kauai eġa tana kaei, mepa da viġaiġaiawa ġaegħena ina tupua.”

*Wavine, daji ġabuġabuna Iesu au kolana i waġi
 (Matthew 26:6-13; John 12:1-8)*

³ Maranai Iesu au Bethani, Simon i ġoreġorei lep-eleperana ana au numa i kiala ma i amam. Wavine, wagi wavana alabaster i voai ma i ġeta ma wagi uana i vogai ma daji ġabuġabuna, maiana ġaegħena e ġoreġorei *nard*, Iesu au kolana i waġi.

⁴ Rava ġelaui kampa i mamae i ġaiawa ma i riwa, “Aiwai aubaina daji u vikalokaloei?”

⁵ Wei dajina ita gimarei 300 *denarii* † ruvana ma manena molamolakai ita verei.” Ma taui, wavine i vienenei.

⁶ Wate Iesu i riwa, “Ona voterei! Aiwai aubaina o yinuabolai? Tauna, kaua aiaina awariu i kaei.

⁷ Molamolakai awarimi e mamae-nonoa ma ona ġoei ma taui ona voagui. Wate tau awarimi eġa ata mamae-nonoa.

⁸ Wavine ana nola i kaei. Tauna, dajiei tupuau i vokaukauana-nonoei vikokoaga aubaina.‡

* **14:1:** Exo 12:1-27 * **14:1:** *Raġona (passover) Exo 12:1 Palawa eġayist maiteni (Unleavened-Bread) Exo 12:17 & 23:15* † **14:5:** Wei lamna me taubagibagi ana maia madęga tagħiġi aubaina. ‡ **14:8:** Mai Jew ai kaua da taubeu dajiei e bulbuloi muriai au kokoaga e tereterei.

9 A ririwana-kauemi, mepa Riwana Aiaina i raugugulei dobu au anatapui, wei wavinena aiwai i kaukauei ina babaniei, ma ega nuanuai ina vuru.”

10 Judas Iskariotei tauna Apasol tagogi, Pirisi Babadai awari i ḡeta da Iesu ita vibenabenamei.

11 Taui i vinuaiai kaua maranai wei i nonori ma Judas i parivainuaġani da mane ita verei. Ma Judas i 'nana da mepa gavogavo ita inanai da Iesu ita amverenei.

Iesu ma Apasol, Raġona torelana i ani.

(Matthew 26:17-25; Luke 22:7-14, 21-23; John 13:21-30)

12 Ma Palawa Bagibagina torela ina vikarei. Maranai sipu orotoi ġauboi e vunuvunui Raġona torelana aubaina. Tauvotaġotaġo, Iesu i paridadanei, “Mepa u ġoeġoei Raġona torelana ana vokaukauei aubaim?”

13 Iesu, taui ruaġa i riwei ma i paritawanei, “Ona nae au Jerusalem ma oroto, waira wagina e avavarai ona inanai ma ona votaġotaġoi.

14 Au numana e ruiruiana, numa taniwigana ona riwei, ‘Ai tauviararamana i riwa, “Numa vokaukauna mepa ma au Tauvotaġotaġo maiteni Raġona torelana ana ani?”

15 “Ma tauna, numa vatavatara ina viatataiem i vokaukauna-nonoei ma kampa aubaita ona vokaukaua.”

16 Tauvotaġotaġo i nae au Jerusalem ma i ririweia nanare i nelāgai ma Raġona torelana i vokaukauei.

17 Au i biga ma Iesu i nei Apasol maiteni.

¹⁸ Taui au kepakepa i amam ma Iesu i riwa, “Anina a ririwemi. Taumi tagogi ina vibenabenameu; tagogi weka maiteni amam.”

¹⁹ Tauvotaḡotaḡo i vinuabola ma tagotagogi ava i pa, “Eḡa tau tapa?”

²⁰ Iesu i paribelei, “Taumi tagogi weka palawa e vivigaloi au aboma tau maiteni.

²¹ Wariaḡa i girugirumia nanare, Rava Natuna ina iraḡe. Wate aiai da Rava Natuna i vibenabenamei; tauna, kovoḡa ḡaeḡaena ina vaia! I aii da alona avena ita vinatunei.”

²² Maranai i amam ma Iesu palawa i vaia ma i viegualau, i vogimagimai ma Tauvotaḡotaḡo i verei ma i riwa, “Ona vaia; wei tupuau.”

²³ Anina ma *wine* kelakana i vaia ma i viegualau ma i verei da anatapui i umei,

²⁴ ⚭“Wei tau tarau itoi rava maḡamaḡaui aubai ma au parivainuaḡana bagibagina ina vovavirewapani.

²⁵ Anina a ririwemi, *wine* eḡa ana uma-melei da maranai God ana rava aubaii ana vigulau.”

²⁶ Ma taui voepaepa welana i ravi ma i ḡae au Ola Olives.

Peter, Iesu ina boviei
(Matthew 26:31-35; Luke 22:31-34; John 13:36-38)

²⁷ Iesu, taui i riwei “I girumi nanare, God i riwa, ‘Tauviḡamoḡamo ana virağeni ma sipu ina vilamonei.’” (Zekariah 13:7)

Ma nanare anatapumi ona ruba-tawaneu.

²⁸ Wate au vomairi au murina ana aivinao au Galili.”

⚇ **14:24:** Exo 24:8; Jer 31:31-34

²⁹ Peter i riwa, “Mepa da anatapui ina rubatawanem, wate ega tau!”

³⁰ Iesu, Peter i riwei, “A ririwana-kauem da amadodo waguvvarai muriai da kokorerekina tou mara ruaiga; tam mara tonuga ma bovieu.”

³¹ Wate Peter, ponana i bagibagi ma i riwa, “Avena mepa da tau, tam maiteni ana irage. Ega melanai ana boviem!” Ma taui gelaui riwana tagogina i latoni.

*Iesu au Gethsemani i raraupari
(Matthew 26:36-46; Luke 22:39-46)*

³² Ma au Gethsemani i geta ma Iesu, ana tau-votagotaigo i riwei, “Weka ona kiala ma ana raupari.”

³³ Ma Peter, James ma John i taravaini ma nuanuana i’rage ma nuanuana i bola-kauei.

³⁴ Ma taui i riwei, “Au nuabola i rata kaua au orau da e vunuvinuiu. Weka ona mae ma ona vineneaga.”

³⁵ Ma aburuna i verau-nae ma au doa i peu ma i raraupari da mepa da tagotagogina, lamna wei marana apoapoena tauna ita netawanei.

³⁶ I riwa i pa, “Abba Amau! Aiwai anatapuna tagotagogina tam awarim. Wei kovoiga kelakana ma vaitawanei. Wate ega tau au goana, wate tam am goana.”

³⁷ Ma Iesu i nememei ma taui tonuga raraunuavurui i nelaiga. Ma Peter i riwei, “Simon! § tam aiwai matavena? Mara aburuna uta vineneaga bo ega?”

§ 14:37: Au Mrk 3:16 Simon wavana i virai da Peter.

38 Ma Iesu, taui i riwei, “Ona vineneğana ma ona raupari da ega au rauelara ona peu! Arua e ġoeğoei, wate tupua i ġokokokakara.”

39 Ma i naeme ma parina tagogina i raupariei.

40 Maranai i nememei ma i nelağai, i matamatave; taui, matai i vitai. Ma taui ega ita aramanei aiwai ita riwei.

41 Mara vitonuina i nene-memei ma taui i riwei, “Taumi amapo ona matamatave ma laumi ina tautau? Anina! Mara i ġetai, ona inanai. Rava Natuna ina vibenabenamei ġo’apoapoe ravai au urai.

42 Ona vomairi; tana nae; ona inana! Tauviben-abenameu e nenei!”

Iesu i pani

(Matthew 26:47-56; Luke 22:47-53; John 18:3-12)

43 Iesu i bababani ma Judas, tauna ana Tauvotağotaġo tagogi i ġetai. Tauna, patara ana apiai maiteni i nei. Pirisi Babadai ma Tarawatu Babadai ma dogadogara, wei ravai i paritawaneiai.

44 Muriae da Iesu awarina ita ġeta; Judas, patara ai mataira i verei, “Orotona ana vigia laġolaġonei; nai tauna. Ona pani ma ona naiei ma ona inana-kaei!”

45 Maranai Judas i ġeta ma i nae Iesu awarina ma i riwei, “Tauviararamana!” Ma i vigia-laġolaġonei.

46 Ma taui, Iesu i vojjini ma i pani.

47 Ma tagogi kampa i maimairi, ana sword i tainalavui ma Pirisi ġegetelarana ana taunola taniġana i borituini.

48 Ma Iesu, taui i riwei, “Taumi ana apiami o nei da ota paniu bo, apamina tau amkwälakwalau?”

49 Marana patapatai taumi maiteni ta mamae au Tempol ma a viararamana ma ega ota paniu. Ma i girugirumia nanare, ina tupua.”

50 Ma Tauvota-gota-go anatapui, Iesu i voterei ma i ruba-tawanei.

51 Ma laraga tagogi, i vikareko ma Iesu i vota-gota-go. Taui i goei da ita vojjini,

52 wate ana kareko i vojjini ma tauna ana kovakovana i ruba.

*Taui, Iesu i etarei,
(Matthew 26:57-68; Luke 22:54-55, 63-71; John
18:13-14, 19-24)*

53 Ma taui, Iesu i naiei Pirisi Gegetelarana. Pirisi Babadai, dogadogara ma Tarawatu Babadai mepa i vitagogieiana.

54 Ma Peter i vota-gota-go da Pirisi Gegetelarana ana numa. Ma ana au debadeba, purusimani maiteni i kiala ma i viviairara.

55 Pirisi Babadai ma mai Jew ai boru gegetelarana,* Iesu ana apoapoe i baiei da ita virageni; ma i baiana-avei.

56 Matamata magama-gaui, Iesu i viwavumorumoruei, wate ai viwavu taputapunei ava.

57 Ma gelaui i vomairi ma wei wavuna morumoruna i kauei Iesu awarina,

58 “Tauai a nonori tauna i riwa, ‘Wei tempolna i voavoaoia. Tau ana rikai ma au pom tonu-ga au murina, Tempol gelauna ana voai ma lamna ega rava ita voai.”

59 Wate nanare ai viwavu taputapunei ava.

* **14:55:** Mai Jew e goregorei *Sanhedrin*.

60 Pirisi ġeġetelarana i mairi taui au naoi ma Iesu i vitara-virevirei, “Wei ravai e viviwavuim ma eġa ai-wai ma paribelei bo?”

61 Ma Iesu i genuana ma eġa ita paribelei.[†] Ma Pirisi ġeġetelarana i vitaraviravirana-melei, “Tam Keriso tauvilawana bo? Viviaiainana Natuna bo?”

62 [◊]Iesu i paribelana, “Tau tauna! Ma *Rava Natuna ona inanai, Vivirewapanana au oienan ina kiala ma mara ladanei ina nei.*

63 Pirisi ġeġetelarana, amlona i ġaigai ma ana gara i sikai ma i riwa, “Aiwai aubaina matamata ġelaui tana ġoei?”

64 Taumi, vijiboġa o nonori ma ami nota aiwai?”

Taui anatapui i riwa, “Tauna ana ġo’apoapoe aubaina anina da ina iraġel!”

65 Ma ġelaui i raukarei ma Iesu i ovai ma naona i purui; i raunavanavai ma i riwei, “Ma pariverelai, aiai i ravim!” Ma tauvipaipai, Iesu i vaia ma i vunui.

*Peter, Iesu i boviei
(Matthew 26:69-75; Luke 22:56-62; John 18:15-18, 25-27)*

66 Ma Peter au gabaura i mamae ma Pirisi ġeġetelarana ana taunola guguini i ġetai.

67 Maranai tauna, Peter i ’nanai i viviairara; ma i ’nana-tunutunui ma i riwa, “Tam maiteni Iesu Nasareti, ana tauvotaġoṭaġo!”

68 Wate tauna i bovi ma i riwa, “Eġa ata aramanei aiwai e bababaniei, a vinuanainei!” Ma i tuopu au metaeta ma [kokorerek i tou[‡]].

[†] **14:61:** Isaiah i parivereta da Keriso ana au iraġe eġa ina gagaloana-melei. (Isa 53:7). [◊] **14:62:** Da 7:13 [‡] **14:68:** Wei riwana buka au wadubo nonoana eġa ita mamae.

69 Taunola guguini, Peter i 'nanai ma i raukarenamelei ma rava au ġereġere i maimairi i riwei, "Wei ravana, taui tagogi!"

70 Wate Peter i bovi me.

Mara aburuna muriai, taui au ġereġere i maimairi, Peter i riwana-melei, "Tam anina, taui tagogi; aubaina tam, Galilieil!"

71 Ma Peter i riwa, "God au matana, tau a ririwa kaua, ravana o ririweia a vivinuanainei!"

72 Maratagogi kokorerekko i tou mara viruaina ma Peter, Iesu riwana i notai - *Muriai da kokorerekko ina tou mara ruāga, tam mara tonuāga ma bovieu*. Ma Peter i vinuabola kaua ma i tou.

15

*Iesu i taravaina-naiei Pilate au naona
(Matthew 27:1-2, 11-19; Luke 23:1-5; John 18:28-38)*

1 Ubaubanai boibogī, pirisi babadai ma dogadogara ma tarawatu babadai anatapui i viboru* ma i vianina da Iesu i pani ma i veredamanei Pilate au urana.

2 Pilate, Iesu i vitara-virevirei i pa, "Tam mai Jew ai gulau bo?" Iesu i paribelei i pa, "Anina e ririwa nanare."

3 Pirisi Babadai e viviwavuim kaua maġamaġau i aubai.

4 Ma nanare Pilate, Iesu i vitaraviraviramelei i pa, "Tam ma paribelana bo eġa? Ma nonori e viviwavuim kaua maġamaġau i aubai!"

* **15:1:** Mrk 14:55 *Sanhedrin*

5 Wate Iesu i genuana ma ega ita paribelei. Ma Pilate i ba kaua.[†]

*Iesu ana iraäge i vianinei
(Matthew 27:15-38; Luke 23:13-25; John 18:39-19:16)*

6 Taui ai kaua maemaena da Ragonia Torelana au marana, Pilate, panipani tagogi, rava ai goanei e ruperupeni ma e vovoterei da e nena.

7 Oroto tagogi wavana Barabas; tauna Rome gabemani i viagaviei ma i pani da panipani au numana i mamae. Ana rava maiteni tauviraägena.

8 Ma patara i geta da Pilate ita vibaägi da panipani tagogi ita rupeni Ragonia Torelana au marana.

9-10 Pilate i paribelei, “Taumi o goegoei da mai Jew ai gulau ana rupeni aubaimi bo?” Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina.

11 Wate Pirisi Babadai, patara i egari da Pilate, Barabas ita rupeni ma ega Iesu.

12 Pilate, patara i paridadana-melei i pa, “Tauna o goegoreia mai Jew ai gulau mena ana kauanei?”

13 Taui i garara, “Ma tuparatui!”

14 Pilate i riwa, “Aiwai apoapoena i kauei?” Ma taui i garara guratana, “Ma tuparatui!”

15 Pilate i goei da patara ita vinuaubai ma Barabas i rupeni ma *sorodia* i egari da Iesu i kwapui da i vitaratarai ma i naei da ita tuparatui.

*Sorodia, Iesu i vinamei
(Matthew 27:27-31; John 19:2-3)*

[†] **15:5:** Mai Rome ai tarawatu e mamae da maranai i viwavuim ma tauetara ega uta paribelei lamna tam anina wavu ma varai.

16 *Sorodia*, Iesu i taravaina-ruei Pilate ana au numa ma ai rava ġelaui i ġoreiai.

17 Ma gara lebalebarina‡ [me gulau ana gara] Iesu i vioteni ma kunuteia ai donadonanei i viri da au kolana i terei.

18 Ma vinamana i raukarei ma i garara, “Equalau mai Jew ai gulau!”

19 Ma kolana gonuei i raviravi ma i ovaovai. Ma ae-tutuiei i mae-ġaira au doa ma i raudunelei ma i vivinamei.

20 Ma i vijiboġa vorovei ma gara lebalebarina i voġiġi-tawanei ma ana gara i vioteni. Ma i taravaina-opunei da ita tuparatui.

Iesu i tuparatui

(Matthew 27:32-44; Luke 23:26-43; John 19:17-37)

21 Tau i nenea ma Simon i nelaġai, rava Sairinie§ (tauna Rufus ma Alexander amai). Simon wapuei i nenei. Ma *sorodia*, tauna i egari da Iesu ana *korosi* i avarai.

22 Taui, Iesu i naiei da gabu i ġoreġorei Golgotha, lamna anona unu gabuna.

23 *Sorodia, wine* bunama *myrrh* maiteni i virai ma Iesu i veredadani, wate tauna i geduaiei.

24 Ma Iesu i tuparatui ma ana gara, taui ava au orai i ġutai.*

25 Ubaubanai 9 kilok nanare, Iesu i tuparatui.

26 Aniviwavuna i girumi ma i tutui, “Mai Jew ai gulau.”

27-28 ‡Danedanenei ruāga, Iesu au ririvana

‡ **15:17:** Eng. *purple*. § **15:21:** Eng. *Cyrenian*. * **15:24:** Taui ġaima i tawanei me *dice* da aiai aiwai garana ita vaia. † **15:27-28:**

i tuparatu; tagogi au oienā ma ġelauna au kelakelauna.[†]

²⁹ *Taubabara, kolai i kwajikwajie i Iesu i vivinamei, “Na! Tam Tempol taurikaina ma au pom tonuġa ma voa-melei.

³⁰ Ma vilawana-melem ma *korosiei* ma ġairai!”

³¹ Ma nanare Pirisi Babadai ma Tarawatu Babadai maiteni, Iesu i vivinamei, “Rava ġelaui i vilawani, wate ainelana ita vilawana-melana-avei.

³² Keriso Tauvilawana, Israel ana gulau; marina *korosiei* ma ġairai ma tana inanai da tana vitumaġanei!” Danedanenei i tupatuparatu maitenai, Iesu i vinamei.

Iesu ana iraġe

(Matthew 27:45-56; Luke 23:44-49; John 19:28-

³⁰)

³³ Ma au benai dobu anatapuna i waguvarei da 3 kilok au bigai.

³⁴ Lamna maranaina Iesu ponana i rata ma i kwatu, “*Eloi, Eloi, lama sabachthani?*” Lamna anona, “*Au God, au God aiwai aubaina u netawaneu?*”

³⁵ Ma rava ġelaui au ġereġere i maimairi i nonori ma i riwa, “Ona rautaniġanei, Elijah e kwatukwatuei!”

³⁶ Ma rava tagogi i ruba da gara ai au damona i pani ma au *wine* tomatomana i vigaloi ma i voepai Iesu au ipirina ma i riwa,[‡] “Ona vipaipai ma tana inanai mepa da Elijah ina nei da ina tereġairei.”

³⁷ Ma Iesu ponana i rata ma i kwatu ma i lavutu tawanana.

† **15:27-28:** Giruma ġelaui waduboi vs 28 e mamae *Ma aiwai i kaukaueia lamna peroveta i ririweia i tupua, Taui i 'nanai me taui go-apoapoe taukauei.* Isa 53:12 * **15:29:** Mrk 14:58 ‡ **15:36:** Psa 69:21 peroveta i girumi da *Keriso* ita verei.

38 Ma Tempol au orana aniteregāgara au pouna i wanasicai au tepana da i ġaira au doa.

39 Ma sorodia ai bada, Iesu au naona i maimairi; i 'nanai da i lavutu tawanana ma i riwa, "Wei anina God Natuna."

40 Waivine ġelaui ueia i mae ma i raraubiga: Mary Magdalene ma Mary (James) keikeina ma Joses§ aloi) ma Salome.

41 Taui, Iesu i votaġotaġoi ma i vovoagui maranai au Galili i mamae ma waivine ġelaui maġamaġau, tauna maiteni i ġegħae au Jerusalem, anatapui kampa.

Iesu i vikokoagei

(*Matthew 27:57-61; Luke 23:50-56; John 19:38-42*)

42-43 Ma au biga i tuturiai Joseph Arimatheaei* tauna rava ġaegħena tagħġi boru ġetelarana au orana. Tauna God ana vigulau ana nei i vipaipaiei. Ma yokaukaua marana (*Lamna Sabat au naona*)† ma Joseph ana teptorana, Pilate awarina i rui ma Iesu taubeuna i vibagħei.

44 Pilate i baiei da Iesu boibogħi i'rāġe. Tauna, sorodia ai bada i kwatuei ma i vitara-virevirei da Iesu i'rāġe bo eġa?

§ **15:40:** Au Mat 27:56, Matthew i girumi Joseph ma ega Joses.

* **15:42-43:** Eng. *Arimathea*. † **15:42-43:** Mai Jew ai *Sabate*, madeġa e nneulai au Friday e vivikarei da madeġa e nneulai au Saturday e kwakwa. Mai Jew ai Tarawatu e ririwa da rava i'rāġe lamna marana tagogħina ina doboi. *Sabate* amadodo madeġa e nneulai ina vikarei lamna aubaina Joseph i volaġilaġina da Iesu taubeuna ita doboi.

⁴⁵ Maranai *sorodia* ai bada i pariverei da anina riwa kaua. Ma Pilate, Joseph i riwei da Iesu tupuana i vaia.

⁴⁶ Joseph, gara maiana ȫaeȫaena i gimarai ma Iesu tupuana i tere-ȫairei. Garei i umai ma au guba tupuana i vimataveni ma ȫaima ȫaeȫaena i kaipeuri da kokoaga metaetana i viaitomeni.

⁴⁷ Mary Magdalene ma Mary - Joses alona i 'nanai mepa Iesu taubeuna i vimataveni.

16

Iesu i vomairi

¹ Ma Sabat au murina, Mary Magdalene ma Mary - James keikeina alona ma Salome, bunama ȫabuȫabui i gimarai da i naiei da Iesu tupuana ita buloi.*

² Ma Sunday ubaubanai boibogī maranai madegā i gogogo, taui i nae au kokoaga.

³ Ma i nenaе ma i bababani, "Aiai aubaita ȫaima kokoaga au metaetana ina kaipeura-tawanei?"

⁴ Maranai taui i taepai, i 'nanai da boibogī ȫaima i kaipeura-tawanei - ȫaima ȫaeȫae kaukauana.

⁵ Maranai i rui au guba ma oroto laragana ana gara ararapoirina i 'nanai au oienat.† Ma taui orai i auepai.

⁶ OROTO LARAGANA i riwa, "Eȫa orami ina auepai, taumi, Iesu Nasaretei o baibaiei bo? I tupatuparatuia;

* **16:1:** Mai Jew ai kaua maemaena da taubeu monamonei ina buloi ma muriai ina doboi ma waivine i ȫoei da wei kauai ita votaȫotaȫgoi. † **16:5:** Tupua i vimataveni au oienat i kiakiala, ana gara ararapoirina.

tauna i vomairi! Ona inana, tauna ēga weka! Taui weka taubeuna i vimataveni.

⁷ *Marina ona nae ma ana tauvotāgotāgo ona riwei, ma Peter ēga nuanuami ina vuru da Iesu e vivinao au Galili. Kampa ona inanai i ririwemi nanare.”

⁸ Taui i opu ma kokoagei i viruberubei ana ini sisisi ma ana rovoi. Taui i rovo kaua, lamna aubaina ēga rava ita riwei.

Mark 16:9-20

Mark Riwana Aiaina damona lamna wariāga i vine-boai. Ma rava ġelauna aiwai i notanotai nanare au vs 9 da 20 i girumi. Wei damonana weka i vikarei.

Iesu, Mary Magdalene awarina i ēga

⁹ Iesu irāgelei i vomairi me au Sunday ubaubanai boibogī ma i ainae da Mary Magdalene awarina i ēga. Maraotai Iesu, Mary awarina arua-apoapoei seven i viopuni.

¹⁰ Iesu, ana tauvotāgotāgo i vivinuabola ma i toutou ma Mary i ġeta da i pariverei.

¹¹ Ma Mary i pariverei da Iesu i lawana me ma tauna matanei Iesu i 'nanai. Wate taui ēga ita vitumāganei.

Iesu, tauvotāgotāgo ruāga awari i ēga

¹² Wei au murina Iesu inanana tapuna ma ana tauvotāgotāgo ruāga awari i ēga; maranai taui i nenaue au melagai.

¹³ Taui i naeme ma tauvotāgotāgo ġelaui i viēgei. Wate taui nanare ēga ita vitumāganei.

Iesu, Taui 11 awari i ēga

* **16:7:** Mrk 14:28

14 Muriai taui 11 i amam ma Iesu awarii i ega. Ma i eni aubaina taui orai i bado ma ega ita vitumaġana maranai rava, i riwei da Tauna i vomairi me.

15 ✽Iesu ana Apasol i riwei, “Ona nae dobu au anatapuna. Ma God Riwana Aiaina ona jimei rava anatapui awarii.

16 Aiai da i vitumaġana ma i babataito; tauna ina lawana. Ma aiai da ega ita vitumaġana ina kovogi.

17 Ma taui aiavoi da i vitumaġana, rewapana ina verei da kaua babai ina kauei. Ma arua-apoapoei ina viopuni ma pona tapunei ina babani.

18 Taui, mota uraiei ina vaia ma waiawa ina umai ma ega ina rauputei. Ma urai doridoriai au kolai ina terei ma ina lawana.”

God, Iesu i ġaiei au Mara

19 ✽BADA Iesu, awari i babani vorovei. Ma tauna i ġaiei au mara ma God au oienā i kiala.

20 Tauvotaġotaġo i opu ma dobu au anatapuna i raraugugula. Ma BADA, taui i voagui ma kaua babai i kaukauei da tauvotaġotaġo aiwai i bababaniei i vovai-virewapani.

Wedau Mark
The Gospel of Mark in the Wedau Language of Papua
New Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 28 Dec 2024 from source files
dated 31 Aug 2023

aa19f3e3-98fb-51fa-9c53-3906edc75f11